



FLETORJA ZYRTARE E REPUBLIKËS SË SHQIPËRISË

Botim i Qendrës së Publikimeve Zyrtare

www.qpz.gov.al

Nr.36

31 mars

2009

P Ë R M B A J T J A

Faqe

Ligj nr.10 090
datë 5.3.2009

Për ratifikimin e konventës ndërkombëtare “Për municionet
thërrmuese” 1931

Ligj nr.10 091
datë 5.3.2009

Për auditimin ligjor, organizimin e profesionit të ekspertit kontabël
të regjistruar dhe të kontabilistit të miratuar 1944

LIGJ
Nr.10 090, datë 5.3.2009

PËR RATIFIKIMIN E KONVENTËS NDËRKOMBËTARE “PËR MUNICIONET THËRRMUESE”

Në mbështetje të neneve 78, 83 pika 1 dhe 121 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Neni 1

Ratifikohet konventa ndërkombëtare “Për municionet thërrmuese”.

Neni 2

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr.6100, datë 19.3.2009 të Presidentit të Republikës së Shqipërisë,
Bamir Topi**

KONFERENCA DIPLOMATIKE
PËR MIRATIMIN E KONVENTËS PËR MUNICIONET THËRRMUESE

CCM/77, 30 maj 2008
Origjinali në anglisht, frëngjisht, spanjisht

Dublin 19–30 maj 2008

Shtetet palë në këtë Konventë,
tepër të shqetësuara për popullatat civile dhe individët civilë të cilët vazhdojnë të mbajnë peshën kryesore të konflikteve të armatosura;

të vendosura t’i japin fund një herë e përgjithmonë vuajtjeve dhe fatkeqësive të shkaktuara nga municionet thërrmuese në momentin e përdorimit të tyre, kur ato nuk funksionojnë më sipas qëllimit të tyre të mëparshëm ose kur janë të braktisur;

të shqetësuara që mbeturinat e municioneve thërrmuese po vrasin apo gjymtojnë civilët, duke përfshirë gratë dhe fëmijët, pengojnë zhvillimin ekonomik dhe shoqëror, duke përfshirë dhe humbjen e jetës, pengojnë rehabilitimin dhe rindërtimin pas konfliktit, vonojnë ose ndalojnë kthimin e refugjatëve dhe personave të shpërngulur brenda për brenda vendit, mund të ndikojnë negativisht në përpjekjet për ndihmesën humanitare kombëtare e ndërkombëtare në lidhje me vendosjen e paqes, si dhe kanë dhe pasoja të tjera të rënda të cilat mund të vazhdojnë për shumë vite pas përdorimit;

tepër të shqetësuara gjithashtu dhe për rreziqet që paraqesin rezervat e mëdha kombëtare të municioneve thërrmuese që mbahen për përdorim operacional dhe të vendosur për të siguruar shkatërrimin e tyre shumë të shpejtë;

duke besuar si të nevojshme që të kontribuojnë me efikasitet e në një mënyrë të bashkërenduar në zgjidhjen e sfidës së largimit të mbeturinave të municioneve thërrmuese në të gjithë botën, dhe për të siguruar shkatërrimin e tyre;

të vendosura gjithashtu të sigurojnë realizimin e plotë të të drejtave të të gjitha viktimave nga municionet thërrmuese dhe të njohin dinjitetin e tyre të qenësishëm;

të vendosura të bëjnë maksimumin e tyre në dhënien e ndihmesës ndaj viktimave të municioneve thërrmuese, duke përfshirë kujdesin mjekësor, rehabilitimin dhe mbështetjen psikologjike ndaj tyre, si dhe sigurimin e tyre social dhe ekonomik;

duke njohur nevojën për t'i dhënë ndihmesë sipas moshës dhe gjinisë viktimave të municioneve thërrmuese dhe për të trajtuar nevojat e veçanta të grupeve të cenueshme;

duke pasur parasysh Konventën për të drejtat e njerëzve me paaftësi, që ndër të tjera, kërkon që shtetet palë në këtë Konventë të sigurojnë dhe nxisin realizimin e plotë të të gjitha të drejtave njerëzore dhe lirive themelore të të gjithë njerëzve me paaftësi pa asnjë lloj diskriminimi që ka lidhje me paaftësinë;

të kujdesshëm në lidhje me nevojën për të bashkërenduar siç duhet përpjekjet e ndërmarra në forma të ndryshme për të mbrojtur të drejtat dhe nevojat e viktimave të llojeve të ndryshme të armëve, dhe të kujdesshëm në shmangien e diskriminimit ndërmjet viktimave të llojeve të ndryshme të armëve;

duke ripohuar që në rastet të cilat nuk mbulohen nga kjo Konventë ose nga marrëveshje të tjera ndërkombëtare, civilët dhe luftëtarët mbeten nën mbrojtjen dhe autoritetin e parimeve të së drejtës ndërkombëtare, që vjen nga traditat e vendosura, nga parimet e humanizmit dhe në varësi të ndërgjegjes publike;

të kujdesshëm gjithashtu edhe për grupet e armatosura që dallohen nga forcat e armatosura të një shteti, në asnjë rrethanë, nuk do të lejohen të përfshihen në ndonjë veprimtari që u ndalohet palëve të shteteve të kësaj Konvente;

duke mirëpritur mbështetjen shumë të gjerë ndërkombëtare për normën ndërkombëtare që ndalon minat kundërnjeri, frymëzuar nga Konventa e 1997-ës për ndalimin e përdorimit, grumbullimit, prodhimit dhe transferimit të minave kundërnjeri dhe për shkatërrimin e tyre;

duke mirëpritur gjithashtu miratimin e protokollit për mbeturinat shpërthyesë të luftës, shtojcë tek konventa për ndalimet ose kufizimet për përdorimin e disa armëve të caktuara konvencionale, të cilat mund të konsiderohen të jenë tepër të rrezikshme ose të kenë efekte të pakontrollueshme, dhe hyrjen e tij në fuqi më 12 nëntor 2006, si dhe duke dëshiruar të rrisin mbrojtjen e civilëve nga efektet e mbeturinave të municioneve thërrmuese në mjediset e pas konflikteve;

duke pasur parasysh gjithashtu dhe rezolutën 1325 të Këshillit të Sigurimit të Kombeve të Bashkuara për gratë, paqen dhe sigurinë dhe rezolutën 1612 të Këshillit të Sigurimit të Kombeve të Bashkuara për fëmijët në konfliktin e armatosur;

duke mirëpritur ndërmarrjen e hapave të mëtejshëm në rang kombëtar, rajonal dhe global gjatë viteve të fundit të cilat kanë pasur si qëllim ndalimin, kufizimin ose zhdukjen e përdorimit, grumbullimit, prodhimit dhe transferimit të municioneve thërrmuese;

duke theksuar rolin e ndërgjegjes publike në çuarjen më tej të parimeve të humanizmit ashtu siç shihet dhe në thirrjen globale për t'i dhënë fund vuajtjeve të civilëve që shkaktohen nga municionet thërrmuese dhe duke njohur përpjekjet e ndërmarra për këtë qëllim nga Kombet e Bashkuara, Komiteti Ndërkombëtar i Kryqit të Kuq, Koalicioni për Municionet Thërrmuese dhe shumë organizata të tjera joqeveritare në të gjithë botën;

duke ripohuar deklaratën e konferencës së Oslos për municionet thërrmuese, në të cilën, ndër të tjera, shtetet njihnin pasojat e rënda të shkaktuara nga përdorimi i municioneve thërrmuese dhe u zotuan për të përfunduar në vitin 2008 një instrument të detyrueshëm ligjor i cili do të ndalonte përdorimin, prodhimin, transferimin dhe grumbullimin e municioneve thërrmuese që shkaktojnë dëme të papranueshme ndaj civilëve, dhe që do të ngrinte një kuadër për bashkëpunimin dhe ndihmesën që do të sillte masat, kujdesin dhe rehabilitimin e duhur për viktimat, për pastrimin e zonave të prekura, edukimin për pakësimin e rrezikut dhe shkatërrimin e stoqeve;

duke theksuar dëshirën për të ftuar praninë e të gjitha shteteve në këtë Konventë dhe të vendosur për të punuar shumë për të nxitur universalizimin e saj dhe zbatimin e plotë të saj;

duke u bazuar në parimet dhe rregullat e së drejtës ndërkombëtare për humanizmin, në veçanti parimin që e drejta e palëve në një konflikt të armatosur të zgjedhin metodat ose mjetet e luftës nuk është e pakufizuar, dhe për rregullat që palët në një konflikt duhet të dallojnë ndërmjet popullsisë civile dhe luftëtarëve, si dhe ndërmjet objekteve civile dhe objektivave ushtarake dhe në këtë këndvështrim t'i drejtojnë operacionet e tyre vetëm kundër objektivave ushtarake, dhe që në sjelljen e operacioneve ushtarake duhet të kushtohet kujdes i vazhdueshëm për të kursyer popullsinë civile, civilët dhe objektet

civile dhe që popullsia civile dhe individët civilë të gëzojnë mbrojtjen e përgjithshme kundër rreziqeve që vijnë nga operacionet ushtarake,
kanë rënë dakord si më poshtë:

Neni 1

Detyrimet e përgjithshme dhe qëllimi i zbatimit

1. Çdo shtet palë, në asnjë rrethanë:
 - a) nuk duhet të përdorë municione thërrmuese;
 - b) nuk duhet të zhvillojë, prodhojë, të marrë, grumbullojë, mbajë ose transferojë tek askush, në mënyrë të drejtpërdrejtë ose jo, municione thërrmuese;
 - c) nuk duhet të ndihmojë, nxisë ose tërheqë dikë tjetër për t'u përfshirë veprimtari aktivitete që janë të ndaluara për shtetet palë në këtë Konventë.
2. Paragrafi 1 i këtij neni, me ndryshimet përkatëse, zbatohet *mutatis mutandis* për aeroplanët bombardues shpërthyes, të cilët janë projektuar në mënyrë të posaçme që të shpërndahen ose të çlirohen nga shpërndarësit e fiksuar në aeroplan.
3. Kjo Konventë nuk zbatohet për minat.

Neni 2

Përkufizimet

Për qëllimet e kësaj Konvente:

1. “Viktima të municioneve thërrmuese” i referohet të gjithë personave të cilët janë vrarë ose vuajnë dëmtime fizike ose psikologjike, humbje ekonomike, përjashtim shoqëror ose cenim thelbësor të përmbushjes së të drejtave të tyre shkaktuar nga përdorimi i municioneve thërrmuese. Ata përfshijnë ato persona që janë prekur në mënyrë të drejtpërdrejtë nga municionet thërrmuese, si dhe familjet dhe bashkësitë e tyre të prekura nga ky fenomen.
2. “Municione thërrmuese” do të thotë municione konvencionale që janë projektuar të shpërndajnë apo çlirojnë nën municione shpërthyes, ku secili peshon më pak se 20 kilogramë, dhe përfshin ato nën municione shpërthyes. Nuk përfshihen, sa më poshtë:
 - a) një municion apo nën municion që është projektuar të shpërndajë flakë, tym, piroteknikë ose mbetje; ose një municion që është projektuar vetëm për një rol të caktuar në mbrojtjen ajrore;
 - b) një municion ose nën municion që është projektuar të prodhojë efekte elektrike ose elektronike;
 - c) një municion që, me qëllim që të shmangen efektet e zonave të pakontrolluara dhe rreziqet që vijnë nga nën municionet e pashpërthyer, ka të gjitha këto karakteristika:
 - i) secili municion përmban më pak se dhjetë nën municione shpërthyes;
 - ii) çdo nën municion shpërthyes peshon më shumë se katër kilogramë;
 - iii) secili nën municion shpërthyes është projektuar të gjejë dhe të merret me një objekt të vetëm të synuar;
 - iv) çdo nën municion shpërthyes është i pajisur me një mekanizëm elektronik vetëshkatërrues;
 - v) Çdo nën municion shpërthyes është i pajisur me një veti elektronike vetëçaktivizuese;
3. “Nën municion shpërthyes” do të thotë një municion konvencional, i cili, me qëllim që të kryejë detyrën e tij, shpërndahet ose çlirohet nga një municion thërrmues dhe është projektuar që të funksionojë duke shpërthyer një ngarkesë shpërthyes para goditjes, në momentin e goditjes apo pas goditjes.
4. “Municion thërrmues i pashpërthyer” i referohet municionit thërrmues që është qëlluar, hedhur, lëshuar ose nxjerrë në një farë forme dhe i cili duhet të kishte shpërndarë apo çliruar nën municionet e veta shpërthyes, por që në fakt nuk e ka bërë këtë gjë.
5. “Nën municion i pashpërthyer” i referohet një nën municioni shpërthyes që është shpërndarë apo çliruar, apo shkëputur nga një municion thërrmues dhe nuk ka arritur të shpërthejë.
6. “Municione thërrmuese të braktisura” i referohet municioneve thërrmuese ose nën municioneve shpërthyes që nuk janë përdorur dhe që janë lënë mënjanë apo hedhur diku, dhe që nuk janë më nën kontrollin e palës që i ka lënë apo hedhur diku. Ato mund të ishin ose jo përgatitur për t'u përdorur.

7. “Mbetjet e municioneve thërrmuese” do të thotë municione thërrmuese të pashpërthyer, municione thërrmuese të braktisura, nëmunicione të pashpërthyer dhe pjesë thërrmuese të pashpërthyer.

8. “Transferim” përfshin, përveç lëvizjes fizike të municionit të pashpërthyer për në ose nga territori kombëtar, transferimi i titullit dhe kontrolli mbi municionet thërrmuese, por nuk përfshin transferimin e territorit që përmban mbetje të municioneve thërrmuese.

9. “Mekanizmi vetëshkatërrues” i referohet një mekanizmi të future me funksion automatik i cili është shtesë e mekanizmit fillestar kryesor i municionit dhe i cili siguron shkatërrimin e municionit në të cilin është futur.

10. “Vetëçaktivizimi” do të thotë nxjerrje automatikisht jashtë funksionit e municioneve nëpërmjet shkarkimit të pakthyesëm të një komponenti, për shembull e një baterie, që është thelbësore për funksionimin e municionit.

11. “Zonë e prekur me municione thërrmuese” do të thotë një zonë e njohur ose e dyshuar që përmban mbeturina të municioneve të thërrmuara.

12. “Mina” i referohet municionit të projektuar për t’u vendosur nën, mbi ose afër tokës ose sipërfaqe të tjera dhe që shpërthen nga prania, afrimi apo kontakti me një person apo automjet.

13. “Pjesa thërrmuese shpërthyesë” do të thotë një municion konvencional, që peshon më pak se 20 kilogramë, që nuk vihet vetë në lëvizje dhe që për të kryer detyrën e vet, shpërndahet ose çlirohet nga një shpërndarës, dhe është projektuar të funksionojë me anë të shpërthimit të një ngarkese shpërthyesë para goditjes, në momentin e goditjes ose pas goditjes.

14. “Shpërndarësi” do të thotë një kontejner që është projektuar që të shpërndajë ose çlirojë pjesë thërrmuese shpërthyesë dhe që është i fiksuar tek një avion në momentin e shpërndarjes apo çlirimit.

15. “Pjesë thërrmuese e pashpërthyer” do të thotë një pjesë thërrmuese e pashpërthyer që është shpërndarë, çliruar ose shpërndarë nga një shpërndarës dhe që nuk ka shpërthyer.

Neni 3

Ruajtja dhe shkatërrimi i stoqeve

1. Çdo shtet palë, në përputhje me rregulloret kombëtare, do të ndajë të gjitha municionet thërrmuese nën juridiksionin e vet dhe do t’i kontrollojë nga municionet e mbajtura për përdorim operacional dhe do t’i regjistrojë për t’i shkatërruar.

2. Çdo shtet palë ndërmerr të shkatërrojë ose sigurojë shkatërrimin e të gjitha municioneve thërrmuese që u përmendën në paragrafin 1 të këtij neni sa më shpejt të jetë e mundur, por jo më vonë se tetë vjet pas hyrjes në fuqi të kësaj Konvente për atë shtet palë. Çdo shtet palë ndërmerr të sigurojë metodat e shkatërrimit në përputhje me standardet ndërkombëtare për mbrojtjen e shëndetit publik dhe të mjedisit.

3. Nëse një shtet palë mendon se nuk do të jetë në gjendje të shkatërrojë ose të sigurojë shkatërrimin e të gjitha municioneve thërrmuese që u përmendën në paragrafin 1 të këtij neni brenda tetë viteve të hyrjes në fuqi të kësaj Konvente për atë shtet palë, ai mund të dorëzojë një kërkesë takimit të shteteve palë ose konferencës së rishikimit për shtyrjen e afatit për përfundimin e shkatërrimit të këtyre municioneve thërrmuese për një periudhë prej deri katër vjetësh. Një shtet anëtar, në rrethana të jashtëzakonshme, mund të kërkojë shtyrje shtesë prej deri në katër vjetësh. Shtyrjet e kërkuara nuk duhet të kalojnë numrin e viteve shumë të nevojshme vetëm për atë shtet anëtar për të përmbushur detyrimet e saj sipas paragrafit 2 të këtij neni.

4. Çdo kërkesë për shtyrje duhet të parashtrojë:

a) kohëzgjatjen e shtyrjes së propozuar;

b) një shpjegim të hollësishëm të shtyrjes së propozuar, duke përfshirë mjetet financiare dhe teknike të disponueshme ose që kërkohen nga pala shtet për shkatërrimin e të gjitha municioneve thërrmuese që përmenden në paragrafin 1 të këtij neni dhe, aty ku ekzistojnë, edhe rrethanat e jashtëzakonshme që e justifikojnë këtë kërkesë;

c) një plan se si dhe kur do të përfundohet shkatërrimi i stoqeve;

d) sasinë dhe llojin e municioneve thërrmuese dhe nëmunicioneve shkatërruese që mbahen me hyrjen në fuqi të kësaj Konvente për atë shtet palë dhe të gjitha municionet shtesë thërrmuese ose nëmunicionet shpërthyesë të zbuluara pas kësaj hyrjeje në fuqi;

e) sasinë dhe llojin e municioneve thërrmuese dhe nënmunicioneve shpërthyesë të shkatërruara gjatë periudhës së përmendur në paragrafin 2 të këtij neni, dhe

f) sasinë dhe llojin e municioneve thërrmuese dhe nënmunicioneve shpërthyesë që mbeten për t'u shkatërruar gjatë shtyrjes së propozuar dhe normën vjetore të shkatërrimit që pritet të arrihet.

5. Takimi i shteteve palë ose konferencës së rishikimit, duke marrë parasysh faktorët e përmendur në paragrafin 4 të këtij neni, do të vlerësojë kërkesën dhe do të vendosë me shumicë votash të shteteve palë që janë të pranishme dhe do të votojnë nëse duan ta plotësojnë kërkesën për shtyrje. Shtetet palë mund të vendosin të japin një shtyrje më të shkurtër sesa ajo që kërkohet dhe mund të propozojnë standarde për shtyrjes, sipas rasteve. Kërkesa për shtyrje afati duhet të dorëzohet minimumi nëntë muaj para takimit të shteteve palëve ose konferencës së rishikimit, ku dhe do të trajtohet.

6. Pavarësisht nga dispozitat e nenit 1 të kësaj Konvente, lejohet mbajtja ose marrja e një numri të kufizuar municionesh thërrmuese dhe nënmunicioneve shpërthyesë për zhvillimin dhe trajnimin në municionet thërrmuese dhe kapjen e nënmunicioneve shpërthyesë, teknikat e pastrimit apo shkatërrimit, ose për zhvillimin e kundërmasave të municioneve thërrmuese. Sasia e nënmunicioneve shpërthyesë të mbajtura ose të marra nuk duhet të tejkalojë numrin minimal që është absolutisht i nevojshëm për këto qëllime.

7. Pavarësisht nga dispozitat e nenit 1 të kësaj Konvente, lejohet transferimi i municioneve thërrmuese në një palës shtet tjetër për qëllimin e shkatërrimit, si dhe për qëllimet e përshkruara në paragrafin 6 të këtij neni.

8. Shtetet palë që mbajnë, marrin apo transferojnë municione thërrmuese apo nënmunicione shpërthyesë për qëllimet e përshkruara në paragrafët 6 dhe 7 të këtij neni do të dorëzojnë një raport të hollësishëm për përdorimin e planifikuar dhe përdorimin aktual të këtyre municioneve thërrmuese dhe nënmunicioneve shpërthyesë dhe llojin e tyre, sasinë dhe numrat e serive. Nëse municionet thërrmuese ose nënmunicionet shpërthyesë transferohen në një shtet tjetër palë për këto qëllime, raporti duhet të përfshijë referencën ndaj palës marrëse. Një raport i tillë duhet të përgatitet çdo vit gjatë të cilit një shtet palë mban, blen apo transferon municione thërrmuese apo nënmunicione shpërthyesë dhe do t'i dorëzohet Sekretarit të Përgjithshëm të Kombeve të Bashkuara jo më vonë se 30 prilli i vitit pasardhës.

Neni 4

Pastrimi dhe shkatërrimi i mbetjeve të municioneve thërrmuese dhe edukimi për pakësimin e rrezikut

1. Çdo shtet palë merr përsipër të pastrojë dhe shkatërrojë, ose të sigurojë pastrimin dhe shkatërrimin e mbeturinave të municioneve thërrmuese të lokalizuara në zonat e prekura me municione thërrmuese nën juridiksionin ose kontrollin e tij, si më poshtë:

a) Aty ku mbeturinat e municioneve thërrmuese ndodhen në zonat nën juridiksionin apo kontrollin e tij në datën e hyrjes në fuqi të kësaj Konvente për atë shtet palë, një pastrim apo shkatërrim i tillë do të përfundohet sa më shpejt të jetë e mundur, por jo më vonë se dhjetë vjet nga ajo datë.

b) Aty ku, pas hyrjes në fuqi të kësaj Konvente për atë shtet palë, municionet thërrmuese janë bërë mbeturina municionesh thërrmuese të lokalizuara në zona që janë nën juridiksionin apo kontrollin e tij, pastrimi dhe shkatërrimi duhet të përfundohet sa më shpejt të jetë e mundur, por jo më vonë se dhjetë vjet pas përfundimit të veprimeve luftarake aktive gjatë të cilave këto municione thërrmuese shndërrohen në mbeturina të municioneve thërrmuese; dhe

c) Pas përbushjes së detyrimeve që parashtrohen në nënparagrafët (a) dhe (b) të këtij paragrafi, ai shtet palë do të bëjë një deklaratë për përbushjen e detyrimeve në takimin pasues të shteteve palë.

2. Gjatë përbushjes së detyrimeve sipas paragrafit 1 të këtij neni, secili shtet palë do të ndërmarrë masat e mëposhtme sa më shpejt të jetë e mundur, duke marrë parasysh dispozitat e nenit 6 të kësaj Konvente në lidhje me bashkëpunimin dhe ndihmesën ndërkombëtare:

a) Vëzhgimi, vlerësimi dhe regjistrimi i rrezikut që i kërcënohet nga mbeturinat e municioneve thërrmuese, duke bërë dhe të gjitha përpjekjet për të identifikuar të gjitha zonat e prekura me municione thërrmuese nën juridiksionin apo kontrollin e tij.

b) Vlerësimi dhe vendosja e nevojave parësore për sa i përket, shënjimit, mbrojtjes së civilëve, pastrimit dhe shkatërrimit, dhe marrjes së hapave për të mobilizuar burimet dhe për të zhvilluar një plan kombëtar për të kryer këto aktivitete, ndërtimin, ku është e mundur, mbi strukturat ekzistuese, përvojat dhe metodologjitë.

c) Ndërmarrja e të gjithë hapave të mundshëm për t'u siguruar që të gjitha zonat e prekura me municione thërrmuese nën juridiksionin apo kontrollin e tij janë të markuara në të gjithë perimetrin e tyre, janë të monitoruara dhe mbrojtura me gardhe ose mjete të tjera për të siguruar mbajtjen larg të civilëve prej tyre. Duhet të përdoren shenja paralajmëruese bazuar në metoda të markimit tashmë të njohura nga komuniteti afër tyre gjatë markimit të zonave të rrezikshme të dyshuara. Shenjat dhe markuesit e tjerë rrethues në zonat e rrezikshme duhet të jenë të dukshme e të lexueshme sa më larg që të jetë e mundur, duhet t'u rezistojnë dhe të jenë të qëndrueshme ndaj efekteve mjedisore dhe duhet që të identifikojnë qartë se cila anë e kufirit të markuar konsiderohet të jetë brenda zonave të prekura me municione thërrmuese dhe cila anë konsiderohet si e sigurt.

d) Pastrimi dhe shkatërrimi i të gjitha mbeturinave të municioneve thërrmuese të lokalizuara në zonat nën juridiksionin apo kontrollin e tij; dhe

e) Organizimi i edukimit për reduktimin e rrezikut, me qëllim që të rritet ndërgjegjësimi te popullata civile që jeton në ose përreth zonave të prekura me municione thërrmuese për rreziqet që u kërcënohen nga mbeturina të tilla.

3. Gjatë kryerjes së aktiviteteve që përmenden në paragrafin 2 të këtij neni, çdo shtet palë duhet të marrë parasysh standardet ndërkombëtare, duke përfshirë standardet ndërkombëtare për veprimin kundër minave (IMAS).

4. Ky paragraf zbatohet në rastet kur municionet thërrmuese janë përdorur apo braktisur nga një shtet palë përpara hyrjes në fuqi të kësaj Konvente për atë shtet palë dhe që janë kthyer në mbeturina municionesh thërrmuese të cilët gjenden në zonat që janë nën juridiksionin apo kontrollin e një Shteti tjetër Anëtar në kohën e hyrjes në fuqi të kësaj Konvente për këtë të fundit.

a) Në këto raste, me hyrjen në fuqi të kësaj Konvente për të dyja shtetet anëtare, shteti i parë anëtar inkurajohet shumë që t'i sigurojë, ndër të tjera, shtetit tjetër anëtar, ndihmesë teknike, financiare, materiale dhe për burimet njerëzore, ose në nivel dypalësh, ose nëpërmjet një pale të tretë për të cilën kanë rënë bashkërisht dakord, duke përfshirë nëpërmjet sistemit të Kombeve të Bashkuara ose organizata të tjera përkatëse, për të lehtësuar shënjimin, pastrimin dhe shkatërrimin e këtyre mbeturinave të municioneve thërrmuese.

b) Një ndihmesë e kësaj natyre do të përfshijë, aty ku është e mundur, informacion në lidhje me llojet dhe sasinë e municioneve thërrmuese që janë përdorur, vendndodhjen e saktë të goditjeve të municioneve thërrmuese dhe zonat në të cilat dihet se ndodhen mbeturinat e municioneve thërrmuese.

5. Nëse një shtet anëtar mendon se nuk është në gjendje të pastrojë dhe të shkatërrojë ose të sigurojë pastrimin dhe shkatërrimin e të gjitha mbeturinave të municioneve thërrmuese që përmenden në paragrafin 1 të këtij neni brenda dhjetë vjetëve pas hyrjes në fuqi të kësaj Konvente për atë shtet anëtar, ai mund të dorëzojë një kërkesë në takimin e shteteve anëtare ose në konferencën e rishikimit për shtyrjen e afatit për përfundimin e pastrimit dhe shkatërrimit të këtyre mbeturinave të municioneve thërrmuese për një periudhë prej deri në pesë vjetësh. Shtyrja e kërkuar nuk duhet të tejkalojë numrin e viteve që duhen domosdoshmërisht që ai shtet anëtar të përmbushë detyrimet e veta sipas paragrafit 1 të këtij neni.

6. Kërkesa për shtyrjen e afatit duhet t'i dorëzohet takimit të shteteve anëtare ose konferencës së rishikimit para skadimit të periudhës kohore që është përmendur në paragrafin 1 të këtij neni për atë shtet anëtar. Secila kërkesë duhet të dorëzohet minimumi nëntë muaj para takimit të shteteve anëtare ose konferencës së rishikimit në të cilën dhe do të trajtohet. Secila kërkesë do të parashtrijë:

a) kohëzgjatjen e shtyrjes së propozuar;

b) një shpjegim të detajuar të arsyeve të shtyrjes së kërkuar, duke përfshirë mjetet financiare dhe teknike që janë në dispozicion dhe ato që kërkohen nga shteti anëtar për pastrimin dhe shkatërrimin e të gjitha mbeturinave të municioneve thërrmuese gjatë shtyrjes së kërkuar të afatit;

c) përgatitjen e punës në të ardhmen dhe statusi i punës që është kryer tashmë sipas programeve kombëtare për pastrimin dhe çminimin gjatë dhjetë viteve të para që përmenden në paragrafin 1 të këtij neni dhe shtyrjet e mëpasshme;

d) zonën totale që përmban mbeturina të municioneve thërrmuese në kohën e hyrjes në fuqi të kësaj Konvente për atë shtet anëtar dhe zonat e tjera që përmbajnë mbeturina municionesh thërrmuese të cilat janë zbuluar pas hyrjes në fuqi të kësaj Konvente;

e) zonën totale që përmban mbeturina municionesh thërrmuese, të cilat janë pastruar që me hyrjen në fuqi të kësaj Konvente;

f) zonën totale që përmban mbeturina të municioneve thërrmuese, të cilat mbeten të pastrohen gjatë shtyrjes së propozuar;

g) rrethanat që kanë penguar aftësinë e shtetit anëtar që të shkatërrojë të gjithë mbeturinat e municioneve thërrmuese në zonat nën juridiksionin apo kontrollin e tij gjatë dhjetë viteve të para që përmenden në paragrafin 1 të këtij neni, dhe ato që mund të pengojnë këtë mundësi gjatë shtyrjes së propozuar të afatit;

h) implikimet humanitare, sociale, ekonomike dhe mjedisore të shtyrjes së propozuar; dhe

i) çdo informacion tjetër që lidhet me kërkesën për shtyrjen e propozuar.

7. Takimi i shteteve anëtare ose konferenca e rishikimit, duke marrë parasysh faktorët që përmenden në paragrafin 6 të këtij neni, duke përfshirë, ndër të tjera, sasitë e raportuara të mbeturinave të municioneve thërrmuese, do të marrë në shqyrtim kërkesën dhe do të vendosë me shumicë votash të shteteve anëtare që do jenë të pranishme, ku dhe do të votohet për të vendosur nëse do t'i miratohet kërkesa për shtyrjen e afatit. Shtetet anëtare mund të vendosin t'i japin një shtyrje afati më të shkurtër sesa ajo që kërkohet dhe mund të propozojë standardet për shtyrjen, sipas rastit.

8. Një shtyrje e tillë mund të rinovohet me një periudhë prej deri në pesë vjetësh pas dorëzimit të kërkesës, në përputhje me paragrafët 5, 6 dhe 7 të këtij neni. Për të kërkuar shtyrje të mëtejshme, shteti anëtar duhet të dorëzojë informacionin shtesë përkatës në lidhje me atë çfarë është bërë gjatë shtyrjes së mëparshme që është dhënë sipas këtij neni.

Neni 5

Ndihmesa ndaj viktimave

1. Secili shtet anëtar, në lidhje me viktimat e municioneve thërrmuese në zonat nën juridiksionin apo kontrollin e tij, në përputhje me ligjin ndërkombëtar humanitar dhe të drejtave të njeriut që është në fuqi, duhet të sigurojë ndihmesës sipas moshës dhe gjinisë, duke përfshirë kujdesin mjekësor, rehabilitimin dhe mbështetjen psikologjike, si dhe të mundësojë përfshirjen e tyre sociale dhe ekonomike. Secili shtet anëtar duhet të bëjë të gjitha përpjekjet për të mbledhur të dhënat përkatëse të besueshme në lidhje me viktimat e municioneve thërrmuese.

2. Gjatë përmbushjes së detyrimeve sipas paragrafit 1 të këtij neni secili shtet anëtar:

a) do të vlerësojë nevojat e viktimave të municioneve thërrmuese;

b) do të zhvillojë, zbatojë dhe imponojë të gjitha ligjet dhe politikat e nevojshme kombëtare;

c) do të zhvillojë një plan dhe buxhet kombëtar, duke përfshirë dhe afatet kohore për të zbatuar këto aktivitete, me synimin për t'i përfshirë ato brenda kuadrit dhe mekanizmave ekzistues kombëtarë për paaftësitë, zhvillimin dhe të drejtat e njeriut, duke respektuar rolin specifik dhe kontributin e aktorëve përkatës;

d) do të ndërmarrë hapa për të mobilizuar burimet kombëtare dhe ndërkombëtare;

e) do të nuk do të ketë diskriminime kundër ose ndërmjet viktimave të municioneve thërrmuese, ose ndërmjet viktimave të municioneve thërrmuese dhe atyre që kanë pësuar dëmtime ose paaftësi nga shkaqe të tjera; ndryshime në trajtimet duhet të bazohen vetëm në nevojat mjekësore, rehabilituese, psikologjike ose social-ekonomike;

f) do të konsultohen ngushtësisht me dhe do të përfshijnë në mënyrë aktive viktimat e municioneve thërrmuese dhe organizatat e tyre përfaqësuese;

g) do të caktojnë një pikë qendrore brenda qeverisë për bashkërendimin e çështjeve që lidhen me zbatimin e këtij neni; dhe

h) do të luftojë për të futur udhëzimet përkatëse dhe praktikat e mira në fushën e kujdesit mjekësor, rehabilitimit dhe mbështetjes psikologjike, si dhe përfshirjen sociale dhe ekonomike.

Neni 6

Bashkëpunimi dhe ndihmesa ndërkombëtare

1. Gjatë përmbushjes së detyrimeve sipas kësaj Konvente, secili shtet anëtar ka të drejtën të kërkojë dhe të marrë ndihmë.

2. Secili shtet anëtar, që është në këtë pozicion, do t'i japë ndihmesë teknike, materiale dhe financiare shteteve anëtare që janë prekur nga municionet thërrmuese, e cila ka si qëllim zbatimin e detyrimeve të kësaj Konvente. Një ndihmesë e tillë mund të sigurohet, ndër të tjera, dhe nëpërmjet

sistemit të Kombeve të Bashkuara, organizatave ose institucioneve ndërkombëtare, rajonale apo kombëtare, ose mbi bazën e marrëdhënies dypalëshe.

3. Secili shtet anëtar merr përsipër të ndihmojë dhe do të ketë të drejtën të marrë pjesë në shkëmbimin më të plotë të mundshëm të pajisjeve dhe informacionit shkencor e teknologjik që lidhen me zbatimin e kësaj Konvente. Shtetet anëtare nuk do të imponojnë kufizime të tepruara në lidhje me sigurimin dhe mundësimin e pastrimit, si dhe pajisje të tjera dhe informacione përkatëse teknologjike për qëllime humanitare.

4. Përveç detyrimeve që mund të ketë sipas paragrafit 4 të nenit 4 të kësaj Konvente, secili shtet anëtar që ndodhet në këtë pozicion, do të sigurojë ndihmesë për pastrimin dhe shkatërrimin e mbeturinave të municioneve thërrmuese, si dhe informacione që lidhen me mjetet e ndryshme dhe teknologjitë që kanë të bëjnë me pastrimin e municioneve thërrmuese, si dhe një listë ekspertësh, agjencish eksperte apo pika kontakti në nivel kombëtar për pastrimin dhe shkatërrimin e mbeturinave të municioneve thërrmuese dhe aktivitetet që lidhen me to.

5. Secili shtet anëtar që gjendet në këtë pozicion, do të japë ndihmesë për shkatërrimin e stoqeve me municione thërrmuese, si dhe do të sigurojë ndihmesë për identifikimin, vlerësimin dhe vendosjen e nevojave parësore dhe masave praktike në lidhje me shënjimin e kufijve, edukimin për reduktimin e riskut, mbrojtjen e civilëve dhe pastrimin dhe shkatërrimin siç parashtrohet në nenin 4 të kësaj Konvente.

6. Në vendet ku, pas hyrjes në fuqi të kësaj Konvente, municionet thërrmuese janë kthyer në mbeturina të municioneve thërrmuese të lokalizuara në zona nën juridiksionin apo kontrollin e një shteti anëtar, secili shtet anëtar që ndodhet në këtë pozicion, do t'i sigurojë ndihmesë emergjente Shtetit Anëtar të prekur.

7. Secili shtet anëtar në këtë pozicion do të sigurojë ndihmesë për zbatimin e detyrimeve që përmenden në nenin 5 të kësaj Konvente për të siguruar ndihmesë sipas moshës dhe gjinisë së viktimave, duke përfshirë kujdesin mjekësor, rehabilitimin dhe mbështetjen psikologjike, si dhe për të siguruar përfshirjen sociale dhe ekonomike të viktimave të municioneve thërrmuese. Kjo ndihmesë mund të sigurohet, ndër të tjera, nëpërmjet sistemit të Kombeve të Bashkuara, organizatave apo institucioneve ndërkombëtare, rajonale apo kombëtare, Komitetit Ndërkombëtar të Kryqit të Kuq, Shoqatës së Kryqit të Kuq Kombëtar dhe Gjysmëhënës së Kuqe dhe Federatës së tyre Ndërkombëtare, organizatat joqeveritare ose në bazë marrëdhënies dypalëshe.

8. Secili shtet anëtar në këtë pozicion duhet të japë ndihmesë për të kontribuar në ripërtëritjen ekonomike dhe sociale që nevojitet si rezultat i përdorimit të municioneve thërrmuese në shtetet e prekura anëtare.

9. Secili shtet anëtar në këtë pozicion mund të kontribuojë në fondet përkatëse të besimit me qëllim që të lehtësojë sigurimin e ndihmesës sipas këtij neni.

10. Secili shtet anëtar që kërkon dhe merr ndihmesë, do të ndërmarrë të gjitha masat e duhura me qëllim që të lehtësojë zbatimin efikas dhe në kohë të kësaj Konvente, duke përfshirë lehtësimin e hyrjes dhe daljes së personelit, materialeve dhe pajisjeve, në një mënyrë të tillë që të jenë në përputhje me ligjet dhe rregulloret kombëtare duke marrë parasysh praktikën më të mira ndërkombëtare.

11. Secili shtet anëtar, me qëllimin për të hartuar një plan kombëtar veprimi, mund t'i kërkojë sistemit të Kombeve të Bashkuara, organizatave rajonale, shteteve të tjera anëtare ose institucioneve të tjera kompetente ndërqeveritare ose joqeveritare që t'u vijë në ndihmë autoriteteve të tij për të vendosur (ndër të tjera) për:

a) natyrën dhe masën e mbeturinave të municioneve thërrmuese të lokalizuara në zonat nën juridiksionin apo kontrollin e tij;

b) burimet financiare, teknologjike dhe njerëzore që kërkohen për zbatimin e planit;

c) kohën e llogaritur si të nevojshme për të pastruar dhe shkatërruar të gjitha mbeturinat e municioneve thërrmuese të lokalizuara në zonat nën juridiksionin apo kontrollin e tij;

d) programet për edukimin e reduktimit të riskut dhe aktivitetet për rritjen e ndërgjegjësimit, me qëllim që të reduktohen plagosjet ose vdekjet e shkaktuara nga mbeturinat e municioneve thërrmuese;

e) ndihmesën ndaj viktimave të municioneve thërrmuese; dhe

f) marrëdhënien bashkërenduese ndërmjet qeverisë së shtetit anëtar të prekur dhe organizatave përkatëse qeveritare, ndërqeveritare ose joqeveritare, të cilat do të punojnë për zbatimin e planit.

12. Shtetet anëtare që do të japin dhe marrin ndihmesë sipas dispozitave të këtij neni, do të bashkëpunojnë për të siguruar zbatimin e plotë dhe të menjëhershëm të programeve për dhënien e ndihmesës.

Neni 7

Masat e transparencës

1. Secili shtet anëtar do t'i raportojë Sekretarit të Përgjithshëm të Kombeve të Bashkuara sa më shpejt të jetë e mundur dhe në çdo rast kjo do të bëhet jo më vonë se 180 ditë pas hyrjes në fuqi të kësaj Konvente për shtetin anëtar, për:

a) masat kombëtare të zbatimit që përmenden në nenin 9 të kësaj Konvente;

b) totalin e të gjitha municioneve thërrmuese, duke përfshirë nënmunicionet shpërthyesë, që përmenden në paragrafin 1 të nenit 3 të kësaj Konvente, duke përfshirë një analizë të llojeve të tyre, sasinë dhe, nëse është e mundur, numrat e serive të secilit lloj;

c) karakteristikat teknike të secilit lloj të municioneve thërrmuese prodhuar nga shteti anëtar para hyrjes në fuqi të kësaj Konvente, për atë sasi që njihet, si dhe ato që janë aktualisht nën pronësinë e tij, duke dhënë, aty ku është e mundur, këto kategori informacionesh të cilat mund të lehtësojnë identifikimin dhe pastrimin e municioneve thërrmuese; minimalisht, ky informacion duhet të përfshijë përmasat, shkrirjen/heqjen e siguresave, përmbajtjen shpërthyesë, përmbajtjen metalike, fotografi me ngjyra dhe informacione të tjera që mund të lehtësojnë pastrimin e mbeturinave të municioneve thërrmuese;

d) statusin dhe progresin e programeve për shndërrimin ose nxjerrjen jashtë funksionit të mjeteve të prodhimit për municionet thërrmuese;

e) statusin dhe progresin e programeve për shkatërrimin, në përputhje me nenin 3 të kësaj Konvente, e municioneve thërrmuese, duke përfshirë nënmunicionet shpërthyesë, me detajet e metodave që do të përdoren gjatë shkatërrimit të tyre, vendndodhjen e të gjitha vendeve të shkatërrimit dhe siguria e zbatueshme dhe standardet mjedisore që do të vëzhgohen;

f) llojet dhe sasinë e municioneve thërrmuese, duke përfshirë nënmunicionet shpërthyesë, të shkatërruara në përputhje me nenin 3 të kësaj Konvente, duke përfshirë detajet e metodave të shkatërrimit që do të përdoren, vendndodhjen e vendit të shkatërrimit dhe sigurinë që do të zbatohet dhe standardet mjedisore që do të vëzhgohen;

g) stoqet e municioneve thërrmuese, duke përfshirë nënmunicionet shpërthyesë, që janë zbuluar pas përfundimit të raportuar të programit që përmendet në nënparagrafin (e) të këtij paragrafi, dhe planet për shkatërrimin e tyre në përputhje me nenin 3 të kësaj Konvente;

h) Deri në masën që do të jetë e mundur, përmasat dhe vendndodhjen e të gjitha zonave të prekura me municione thërrmuese që janë nën juridiksionin apo kontrollin e tij, duke përfshirë sa më shumë detaje që të jetë e mundur në lidhje me llojin dhe sasinë e çdo mbeturine të municioneve thërrmuese në secilën zonë dhe kur janë përdorur ato;

i) statusin dhe progresin e programeve për pastrimin dhe shkatërrimin e të gjitha llojeve dhe sasive të mbeturinave të municioneve thërrmuese të pastruara dhe të shkatërruara në përputhje me nenin 4 të kësaj Konvente, duke përfshirë përmasat dhe vendndodhjen e zonave të prekura me municione thërrmuese që janë pastruar, dhe një analizë të sasisë së secilit lloj të mbeturinave të municioneve thërrmuese që janë pastruara e shkatërruar;

j) masat e mara për të siguruar edukimin për reduktimin e riskut dhe, në veçanti, një paralajmërim të menjëhershëm dhe efikas për popullatën civile që jeton në zonat e prekura me municione thërrmuese nën juridiksionin apo kontrollin e tij;

k) statusin dhe progresin e zbatimit të detyrimeve të tij sipas nenit 5 të kësaj Konvente për të siguruar ndihmesë sipas moshës dhe gjinisë, duke përfshirë kujdesin mjekësor, rehabilitimin, dhe mbështetjen psikologjike, si dhe sigurimi i përfshirjes sociale dhe ekonomike së viktimave të municioneve thërrmuese dhe për të grumbulluar të dhëna të besueshme në lidhje me viktimat e municioneve thërrmuese;

l) emrat dhe hollësitë e kontakteve të institucioneve të caktuara për të siguruar informacionin dhe për të zbatuar masat e përshkruara në këtë paragraf;

m) sasinë e burimeve kombëtare, duke përfshirë ato financiare, materiale ose në natyrë, lidhur me zbatimin e neneve 3, 4 dhe 5 të kësaj Konvente; dhe

n) sasinë, llojet dhe destinacionet e bashkëpunimit dhe ndihmesës ndërkombëtare sipas nenit 6 të kësaj Konvente.

2. Informacioni që jepet në përputhje me paragrafin 1 të këtij neni, do të përditësohet nga shtetet anëtare çdo vit, duke mbuluar vitin paraardhës kalendarik, dhe do të raportohet tek Sekretari i Përgjithshëm i Kombeve të Bashkuara jo më vonë se 30 prilli i çdo viti.

3. Sekretari i Përgjithshëm i Kombeve të Bashkuara do t'ia përcjellë të gjitha këto raporte që merr të gjitha shteteve anëtare.

Neni 8

Lehtësimi dhe qartësimi i zbatimit

1. Shtetet anëtare bien dakord të këshillohen dhe veprojnë me njëra-tjetrën në lidhje me zbatimin e dispozitave të kësaj Konvente dhe të punojnë së bashku me një shpirt bashkëpunimi për të lehtësuar këtë zbatim nga shtetet anëtare sipas detyrimeve të tyre në bazë të kësaj Konvente.

2. Nëse një ose më shumë shtete anëtare dëshirojnë të qartësojnë apo të kërkojnë të zgjidhin çështje që lidhen me zbatimin e dispozitave të kësaj Konvente nga ana e një Shteti tjetër, mund t'i dorëzojë shtetit tjetër anëtar, nëpërmjet Sekretarit të Përgjithshëm të Kombeve të Bashkuara një kërkesë për sqarime në lidhje me atë çështje. Kjo kërkesë duhet të shoqërohet me të gjithë informacionin e duhur. Çdo shtet anëtar duhet të përmbahet ndaj kërkesa për sqarime që janë të pabaza, duke treguar kujdes në shmangien e abuzimeve. Një shtet anëtar që merr një kërkesë për sqarim, nëpërmjet Sekretarit të Përgjithshëm të Kombeve të Bashkuara, brenda 28 ditëve, duhet t'i japë palës kërkuese të gjithë informacionin që do të ndihmonte në qartësimin e çështjes.

3. Nëse shteti anëtar kërkues nuk merr përgjigje nëpërmjet Sekretarit të Përgjithshëm të Kombeve të Bashkuara brenda asaj periudhe kohore, ose e konsideron si të pakënaqshme përgjigjen e kërkesës për sqarim, mund ta dorëzojë çështjen, nëpërmjet Sekretarit të Përgjithshëm të Kombeve të Bashkuara, në takimin pasardhës të shteteve anëtare. Sekretari i Përgjithshëm i Kombeve të Bashkuara do ta transmetojë kërkesën, shoqëruar me të gjithë informacionin e nevojshëm që lidhet me kërkesën për sqarim, tek të gjitha shtetet anëtare. I gjithë ky informacion do t'i prezantohet shtetit anëtar kërkues, i cili do të ketë të drejtën për t'u përgjigjur.

4. Në pritje të realizimit të takimit të shteteve anëtare, secili shtet anëtar mund t'i kërkojë Sekretarit të Përgjithshëm të Kombeve të Bashkuara që të kontribuojë duke ndihmuar në dhënien e sqarimeve të kërkuara.

5. Në rastin kur i është dorëzuar një çështje, sipas paragrafit 3 të këtij neni, takimi i shteteve anëtare fillimisht do të vendosë nëse do ta trajtojë çështjen më tej ose jo, duke marrë parasysh të gjithë informacionin që i është dorëzuar nga shteti anëtar në fjalë. Nëse vendos kështu, takimi i shteteve anëtare mund t'u sugjerojë shteteve anëtare mënyra dhe mjete të tjera për të qartësuar ose zgjidhur çështjen në fjalë, duke përfshirë fillimin e procedurave përkatëse në përputhje me ligjin ndërkombëtar. Në rrethanat kur çështja në fjalë vendoset se është ashtu për shkak të rrethanave përtej kontrollit të shtetit anëtar kërkues, takimi i shteteve anëtare mund të rekomandojë masat e përshtatshme, duke përfshirë përdorimin e masave bashkëpunuese që përmenden në nenin 6 të kësaj Konvente.

6. Përveç procedurave që jepen në paragrafët 2 deri në 5 të këtij neni, takimi i shteteve anëtare mund të vendosë të miratojë këto procedura të tjera të përgjithshme ose mekanizma të posaçëm për qartësimin e përputhshmërisë, duke përfshirë fakte, dhe zgjidhjen e rasteve të moszbatimit të dispozitave të kësaj Konvente ashtu si mendohet se është më e përshtatshme.

Neni 9

Masat kombëtare të zbatimit

Secili shtet anëtar do të ndërmarrë të gjitha masat e duhura ligjore, administrative ose masa të tjera për ta zbatuar këtë Konventë, duke përfshirë vendosjen e sanksioneve penale për të parandaluar dhe shmangur çdo aktivitet të ndaluar për një shtet anëtar sipas kësaj Konvente të ndërmarra nga persona ose në territorin që ndodhet nën juridiksionin apo kontrollin e tij.

Neni 10

Zgjidhja e mosmarrëveshjeve

1. Kur ka një mosmarrëveshje ndërmjet dy ose më shumë shteteve anëtare që lidhet me interpretimin ose zbatimin e kësaj Konvente, shtetet anëtare të përfshira në këtë mosmarrëveshje do të konsultohen me qëllimin që të arrihet një zgjidhje e shpejtë e mosmarrëveshjes nëpërmjet negociatave ose me anë të mjeteve të tjera paqësore sipas zgjedhjes së tyre, duke përfshirë mbështetjen e takimit të shteteve anëtare dhe duke iu referuar Gjykatës Ndërkombëtare të Drejtësisë në përputhje me Statutin e Gjykatës.

2. Takimi i shteteve anëtare mund të kontribuojë në zgjidhjen e mosmarrëveshjes me të gjitha mjetet që shihen të arsyeshme, duke përfshirë ndihmën e tij të vlefshme, duke i bërë thirrje shteteve anëtare të përfshira të fillojnë procedurat e zgjidhjes së mosmarrëveshjes sipas zgjedhjes së tyre dhe duke rekomanduar një afat kohor për çdo procedure për të cilën do bihet dakord.

Neni 11

Takimet e shteteve anëtare

1. Shtetet anëtare do të takohen rregullisht me qëllim që, aty ku është e nevojshme, të marrin parasysh dhe të marrin vendime në lidhje me çdo çështje që lidhet me zbatimin ose zbatimin e kësaj Konvente, duke përfshirë:

- a) operimin dhe statusin e kësaj Konvente;
- b) problemet që vijnë nga raportet që janë dorëzuar sipas dispozitave të kësaj Konvente;
- c) bashkëpunimin dhe ndihmesën ndërkombëtare në përputhje me nenin 6 të kësaj Konvente;
- d) zhvillimin e teknologjive për pastrimin e mbeturinave të municioneve tërërmuese;
- e) raportet e shteteve anëtare sipas nenit 8 dhe 10 të kësaj Konvente; dhe
- f) raportet e shteteve anëtare sipas neneve 3 dhe 4 të kësaj Konvente.

2. Takimi i parë i shteteve anëtare do të organizohet nga Sekretari i Përgjithshëm i Kombeve të Bashkuara brenda një viti pas hyrjes në fuqi të kësaj Konvente. Takimet e mëpasshme do të organizohen nga Sekretari i Përgjithshëm i Kombeve të Bashkuara çdo vit deri në konferencën e parë të rishikimit.

3. Shtetet që nuk janë palë në këtë Konventë, si dhe Kombet e Bashkuara, organizata apo institucione të tjera përkatëse ndërkombëtare, organizatat rajonale, Komiteti Ndërkombëtar i Kryqit të Kuq, Federata Ndërkombëtare e Kryqit të Kuq dhe Shoqata e Gjysmëhënës së Kuqe, si dhe organizata të tjera joqeveritare mund të ftohen që të marrin pjesë në këto takime si vëzhgues në përputhje me rregullat e vendosura të procedurës.

Neni 12

Konferencat e rishikimit

1. Një konferencë rishikimi do të organizohet nga Sekretari i Përgjithshëm i Kombeve të Bashkuara pesë vjet pas hyrjes në fuqi të kësaj Konvente. Konferencat e tjera të rishikimit do të organizohen nga Sekretari i Përgjithshëm i Kombeve të Bashkuara nëse kjo gjë do të kërkohet nga një ose më shumë nga shtetet anëtare, me kusht që intervali ndërmjet konferencave të raportimit të jetë më pak se pesë vjet. Të gjitha shtetet anëtare në këtë Konventë do të ftohen në çdo konferencë rishikimi.

2. Qëllimi i konferencës së rishikimit do të jetë:

- a) të rishikojë funksionimin dhe statusin e kësaj konvente;
- b) të marrë në konsideratë nevojën për dhe intervalin ndërmjet takimeve të mëtejshme të shteteve anëtare që përmendet në paragrafin 2 të nenit 11 të kësaj Konvente; dhe
- c) të marrë vendime për raportimet e shteteve anëtare, siç parashtrohet në nenet 3 dhe 4 të kësaj Konvente.

3. Shtetet që nuk janë palë në këtë Konventë, si dhe Kombet e Bashkuara, organizatat apo institucionet e tjera përkatëse, organizatat rajonale, Komiteti Ndërkombëtar i Kryqit të Kuq, Federata Ndërkombëtare e Kryqit të Kuq dhe Shoqatat e Gjysmëhënës së Kuqe dhe organizata të tjera përkatëse joqeveritare mund të ftohen për të marrë pjesë në të gjitha konferencat e rishikimit si vëzhgues në përputhje me rregullat e vendosura procedurale.

Neni 13

Ndryshimet

1. Në çdo moment, pas hyrjes në fuqi të kësaj Konvente, secili shtet anëtar mund të propozojë ndryshime për këtë Konventë. Çdo propozim për ndryshime do t'i komunikohet Sekretarit të Përgjithshëm të Kombeve të Bashkuara, i cili do t'ia qarkullojë atë të gjitha shteteve anëtare dhe do të kërkojë mendimin e tyre për faktin nëse duhet të mbledhet një konferencë ndryshimi apo jo për të shqyrtuar këtë propozim. Nëse pjesa më e madhe e shteteve anëtare njofton Sekretarin e Përgjithshëm të Kombeve të Bashkuara jo më vonë se 90 ditë pas njoftimit se ata janë në mbështetje të propozimit,

atëherë Sekretari i Përgjithshëm i Kombeve të Bashkuara do të mbledhë një konferencë ndryshimi në të cilën do të ftohen të marrin pjesë të gjitha shtetet anëtare.

2. Shtetet që nuk janë palë në këtë Konventë, si dhe Kombet e Bashkuara, organizata apo institucione të tjera përkatëse ndërkombëtare, organizata rajonale, Komiteti Ndërkombëtar i Kryqit të kuq, Federata Ndërkombëtare e Kryqit të Kuq dhe Shoqatat e Gjysmëhënës së Kuqe, si dhe organizata përkatëse joqeveritare mund të ftohen të marrin pjesë në çdo konferencë ndryshimi si vëzhgues, në përputhje me rregullat e vendosura procedurale.

3. Konferenca e ndryshimit do të mbahet menjëherë pas takimit të shteteve anëtare ose konferencës së rishikimit, me përjashtim të rasteve kur pjesa më e madhe e shteteve anëtare kërkon që ajo të organizohet më shpejt.

4. Çdo ndryshim i kësaj Konvente do të miratohet nga pjesa më e madhe prej dy të tretat e shteteve anëtare të pranishme dhe duke votuar në konferencën e ndryshimit. Depozituesi do të komunikojë çdo ndryshim që miratohet tek të gjitha shtetet.

5. Një ndryshim i kësaj Konvente do të hyjë në fuqi për shtetet anëtare të cilat e kanë pranuar ndryshimin në datën e depozitimit të pranimeve nga pjesa më e madhe e shteteve të cilat ishin dakord në datën e miratimit të ndryshimit. Si rrjedhim ai do të hyjë në fuqi dhe për shtetet anëtare që mbeten në datën e depozitimit instrumentit të pranimit të tij.

Neni 14

Kostot dhe detyrat administrative

1. Kostot e takimeve të shteteve anëtare, konferencat e rishikimit dhe konferencave të ndryshimeve do të mbarten nga shtetet anëtare dhe shtetet që nuk janë anëtare në këtë Konventë por që marrin pjesë, në përputhje me shkallën e vlerësimit të Shteteve të Bashkuara të rregulluar përkatësisht.

2. Kostot që vijnë nga Sekretari i Përgjithshëm i Kombeve të Bashkuara, sipas neneve 7 dhe 8 të kësaj Konvente, do të paguhet nga shtetet anëtare në përputhje me klasifikimin e vlerësimit të Kombeve të Bashkuara të rregulluar përkatësisht.

3. Kryerja e detyrave administrative nga ana e Sekretarit të Përgjithshëm të Kombeve të Bashkuara që i janë caktuar atij ose asaj sipas kësaj Konvente është objekt i një mandati përkatës të Kombeve të Bashkuara.

Neni 15

Nënshkrimi

Kjo Konventë, realizuar në Dublin më datën 30 maj 2008, do të hapet për t'u nënshkruar në Oslo nga të gjitha shtetet më datën 3 dhjetor 2008 dhe më pas në selinë e Kombeve të Bashkuara në Nju-Jork deri në hyrjen e saj në fuqi.

Neni 16

Ratifikimi, pranimi, miratimi ose hyrja në fuqi

1. Kjo Konventë është objekt ratifikimi, pranimi ose miratimi nga nënshkruesit.
2. Ajo do të jetë e hapur për t'u pranuar nga çdo shtet që nuk e ka firmosur Konventën.
3. Instrumentet e ratifikimit, pranimit, miratimit ose rënies dakord do të depozitohen tek depozituesi.

Neni 17

Hyrja në fuqi

1. Kjo Konventë do të hyjë në fuqi në ditën e parë të gjashtë muajve pas muajit në të cilin është depozituar instrumenti i tridhjetë i ratifikimit, pranimit, miratimit apo rënies dakord.

2. Për çdo shtet që depoziton instrumentin e vet të ratifikimit, pranimit, miratimit apo rënies dakord pas datës së depozitimit të instrumentit të tridhjetë të ratifikimit, pranimit, miratimit apo rënies dakord, kjo Konventë do të hyjë në fuqi në ditën e parë të muajit të gjashtë pas datës në të cilën ai shtet ka depozituar instrumentin e vet të ratifikimit, pranimit, miratimit apo rënies dakord.

Neni 18
Zbatimi provizor

Secili shtet, në kohën e ratifikimit, pranimit, miratimit apo hyrjes, mund të deklarojë që do ta zbatojë provizorisht nenin 1 të kësaj Konvente, duke lënë pezull hyrjen në fuqi të saj për atë shtet.

Neni 19
Rezervimet

Nenet e kësaj Konvente nuk do të jenë objekt i rezervimeve.

Neni 20
Kohëzgjatja dhe tërheqja

1. Kjo Konventë do të jetë me një kohëzgjatje të pacaktuar.
2. Çdo shtet anëtar, duke ushtruar të drejtat e veta kombëtare, ka të drejtën të tërhiqet nga kjo Konventë. Për këtë tërheqje ai duhet të njoftojë të gjitha shteteve të tjera anëtare, depozituesin dhe Këshillin e Sigurisë së Kombeve të Bashkuara. Ky instrument i tërheqjes do të përfshijë një shpjegim të plotë të arsyeve që kanë çuar në këtë tërheqje.
3. Tërheqja do të hyjë në fuqi vetëm pas gjashtë muajve pas marrjes së instrumentit të tërheqjes nga depozituesi. Nëse ndodh që gjatë skadimit të asaj periudhe gjashtëmujore, shteti anëtar të jetë i angazhuar në konflikt të armatosur, tërheqja nuk do të hyjë në fuqi para përfundimit të konfliktit të armatosur.

Neni 21
Marrëdhëniet me shtetet që nuk janë anëtare në këtë Konventë

1. Çdo shtet anëtar do të inkurajojë shtetet që nuk janë palë në këtë Konventë që të ratifikojnë, pranojnë, miratojnë apo të bien dakord me këtë Konventë, me qëllimin për të tërhequr më shumë anëtarë nga të gjitha shtetet në këtë Konventë.
2. Çdo shtet anëtar do të njoftojë qeveritë e shteteve që nuk janë anëtare në këtë Konventë, që përmenden në paragrafin 3 të këtij neni, për detyrimet e veta sipas kësaj Konvente, do të promovojë normat që ka vendosur dhe do të bëjë përpjekjet më të mëdha që të dekurajojë shtetet që nuk janë anëtare në këtë Konventë në përdorimin e municioneve tërhmuese.
3. Pavarësisht dispozitave të nenit 1 të kësaj Konvente dhe në përputhje me të drejtën ndërkombëtare, shtetet anëtare, personeli i tyre ushtarak apo qytetarët e tyre, mund të përfshihen në bashkëpunime dhe operacione ushtarake me shtetet që nuk janë anëtare në këtë Konventë të cilat mund të jenë pjesë e aktiviteteve që janë të ndaluara për një shtet anëtar.
4. Asnjë pikë në paragrafin 3 të këtij neni nuk do ta autorizojë një shtet anëtar:
 - a) të zhvillojë, prodhojë apo marrë në ndonjë formë municione tërhmuese;
 - b) të krijojë vetë ose të transferojë stoqe me municione tërhmuese;
 - c) të përdorë vetë municione tërhmuese; ose
 - d) të kërkojë në mënyrë të qartë përdorimin e municioneve tërhmuese në rastet kur zgjedhja e municioneve të përdorura është nën kontrollin e vet ekskluziv.

Neni 22
Depozituesi

Sekretari i Përgjithshëm i Kombeve të Bashkuara është caktuar si depozituesi i kësaj Konvente.

Neni 23
Tekstet autentike

Tekstet në gjuhën arabe, kineze, angleze, franceze, ruse dhe spanjolle të kësaj Konvente do të jenë njësoj autentike.

LIGJ
Nr.10 091, datë 5.3.2009

**PËR AUDITIMIN LIGJOR, ORGANIZIMIN E PROFESIONIT TË EKSPERTIT
KONTABËL TË REGJISTRUAR DHE TË KONTABILISTIT TË MIRATUAR**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

KREU I
DISPOZITA TË PËRGJITHSHME

Neni 1

Qëllimi dhe objekti

1. Ky ligj ka për qëllim përmirësimin dhe forcimin e mbikëqyrjes publike të profesionit të ekspertit kontabël të regjistruar, si dhe rregullimin e profesionit të kontabilistit të miratuar.

2. Ky ligj parashikon dispozitat që rregullojnë auditimin ligjor të pasqyrave financiare vjetore, individuale dhe të konsoliduara, organizimin e profesionit të ekspertit kontabël, të shoqërive të auditimit, të kontabilistit të miratuar, si dhe rregullimin e organizatave profesionale në fushën e kontabilitetit.

Neni 2

Përkufizime

Në këtë ligj termat e mëposhtëm kanë këto kuptime:

1. “Auditim ligjor” është auditimi i pavarur, i detyrueshëm i pasqyrave financiare vjetore individuale dhe/ose të konsoliduara të personave juridikë dhe që kryhet nga ekspertë kontabël të regjistruar apo shoqëri auditimi.

2. “Ekspert kontabël i regjistruar i huaj” është personi fizik, i licencuar për kryerjen e auditimit ligjor të pasqyrave financiare, individuale dhe/ose të konsoliduara të personave juridikë në një shtet tjetër.

3. “Ekspert kontabël i regjistruar i grupit” është eksperti kontabël i regjistruar, ose shoqëria e auditimit, që kryen auditimin ligjor të disa shoqërive tregtare, pasqyrat financiare të të cilave i nënshtrohen konsolidimit.

4. “Autoriteti i Certifikimit” është struktura e krijuar, në përputhje me dispozitat e këtij ligji, që merret me testimin e kandidatëve dhe shpalljen e rezultateve të kandidatëve për ekspert kontabël të regjistruar dhe kontabilist të miratuar.

5. “Autoriteti i Regjistrimit” është struktura e krijuar, në përputhje me dispozitat e këtij ligji, që vendos për regjistrimin apo çregjistrimin nga regjistri publik të ekspertëve kontabël, të individëve të certifikuar nga Autoriteti i Certifikimit, të ekspertëve kontabël të regjistruar të huaj dhe të shoqërive të auditimit vendase dhe të huaja.

6. “Bordi i mbikëqyrjes publike” është organi kolegjal i mbikëqyrjes publike të profesionit të ekspertëve kontabël të regjistruar, i cili ka, gjithashtu, kompetenca edhe për mbikëqyrjen e organizmave profesionale të kontabilistëve të miratuar.

7. “Ekspert kontabël i regjistruar” është profesionisti i pavarur, i regjistruar në regjistrin publik të ekspertëve kontabël, në përputhje me dispozitat e këtij ligji, i cili ushtron profesionin për auditimin ligjor të pasqyrave financiare vjetore, individuale dhe/ose të konsoliduara, të shoqërive tregtare, ndërmarrjeve apo organizatave të tjera, kur auditimi detyrohet nga ligji ose kërkohet nga ortakët/aksionarët e tyre. Eksperti kontabël kryen edhe shërbimet e kontabilitetit dhe shërbimet e rishikimit e të dhënies së sigurisë për informacionet financiare dhe shërbimet e lidhura, sipas

përcaktimeve të bëra për to në manualin e deklaratave ndërkombëtare të auditimit, dhënies së sigurisë dhe etikës të Federatës Ndërkombëtare të Kontabilistëve, kur ato janë në pajtim me natyrën e profesionit dhe me kërkesat e legjislacionit në fuqi. Në këtë ligj përdorimi i termit “ekspert kontabël” ka kuptim të njëjtë me përdorimin e termit “ekspert kontabël i autorizuar” i përdorur nga ligje të tjera të miratuara përpara hyrjes në fuqi të këtij ligji dhe anasjelltas. Në varësi të kontekstit ku ky term përmendet, interpretimi i tij përfshin edhe shoqërinë e auditimit.

8. “Kandidat” është personi fizik, i cili është pranuar nga organizmi profesional i ekspertëve kontabël të regjistruar, për të kryer stazhin profesional të përgatitjes teoriko-praktike pranë një eksperti kontabël ose një shoqërie auditimi.

9. “Kontabilist i miratuar” është personi fizik, profesionist i lirë, i regjistruar në regjistrin e njëres prej organizatave profesionale të kontabilistëve të miratuar, që kontraktohet nga personi juridik, për të kryer shërbime të kontabilitetit. Ai mund të kryejë edhe shërbime të tjera, të cilat nuk bien në kundërshtim me kërkesat e legjislacionit në fuqi.

10. “Organizata profesionale e ekspertëve kontabël të regjistruar” është organizmi profesional, që grupon ekspertët kontabël të regjistruar dhe shoqëritë e auditimit që ushtrojnë veprimtarinë në Republikën e Shqipërisë. “Instituti i Ekspertëve Kontabël të Autorizuar” është emërtimi i organizatës profesionale të ekspertëve kontabël të regjistruar, e cila është regjistruar në Gjykatën e Rrethit Gjyqësor, Tiranë me vendimin nr.3573, datë 16.10.1998. Ky emërtim mund të ndryshohet, në përputhje me procedurat statutores të organizatës.

11. “Organizata profesionale të kontabilistëve të miratuar” janë organizimet e profesionistëve kontabilistë, që kanë jo më pak se 50 anëtarë, që e ushtrojnë veprimtarinë e tyre në fushën e shërbimeve të kontabilitetit, të organizuar përkatësisht në njërin nga organizatat profesionale të kontabilistëve, në të cilat përfshihen edhe shoqëritë e kontabilitetit.

12. “Ortaku kryesor i auditimit” është:

a) eksperti kontabël i regjistruar, i cili, në një angazhim auditimi, është ngarkuar nga shoqëria e auditimit me përgjegjësinë kryesore për kryerjen e auditimit ligjor në emër të shoqërisë së auditimit;

b) në rastin e një auditimi të shoqërive të grupit, eksperti kontabël i regjistruar, i cili është ngarkuar nga shoqëria e auditimit me përgjegjësinë kryesore për kryerjen e auditimit të grupit;

c) eksperti kontabël i regjistruar, që nënshkruan raportin e ekspertit kontabël të regjistruar të pavarur.

13. “Person që nuk e ushtron profesionin” është personi fizik, i cili ka qenë i regjistruar prej Autoritetit të Regjistrimit në regjistrin publik të organizmit profesional, që grupon ekspertët kontabël, por që nuk ka kryer auditime, nuk ka pasur të drejtë vote në një shoqëri auditimi, nuk ka qenë anëtar i organit administrativ ose drejtues i një shoqërie auditimi dhe nuk ka qenë i punësuar apo i angazhuar në forma të tjera në një shoqëri auditimi prej, të paktën, tri vitesh.

14. “Raporti i ekspertit kontabël të regjistruar” është raporti që përgatitet nga eksperti kontabël ose shoqëria e auditimit, në pajtim me standardet ndërkombëtare të auditimit (SNA), të publikuara nga Federata Ndërkombëtare e Kontabilistëve.

15. “Regjistri publik i ekspertëve kontabël të regjistruar” është regjistri i ekspertëve kontabël, ekspertëve kontabël të regjistruar të huaj dhe shoqërive të auditimit, vendase e të huaja, të cilat autorizohen të angazhohen në auditimin ligjor të pasqyrave financiare, individuale dhe të konsoliduara të entiteteve, që zhvillojnë veprimtarinë e tyre në Republikën e Shqipërisë.

16. “Rrjet i ekspertëve kontabël të regjistruar” është një strukturë e madhe bashkëpunimi, ku marrin pjesë ekspertët kontabël të regjistruar dhe shoqëritë e auditimit, e cila ka për qëllim realizimin e ndarjes së fitimit apo kostos, pronësinë, drejtimin ose kontrollin e përbashkët, përdorimin e politikave dhe procedurave të njëjta të kontrollit të cilësisë, strategji biznesi të përbashkët, përdorimin e të njëjtit emër tregtar ose të një pjese të rëndësishme të burimeve profesionale.

17. “Standardet ndërkombëtare të auditimit” janë standardet e miratuara dhe të publikuara nga bordi i standardeve ndërkombëtare të auditimit dhe të dhënies së sigurisë të Federatës Ndërkombëtare të Kontabilistëve (FNK).

18. “Standardet ndërkombëtare të raportimit financiar” janë standardet ndërkombëtare të kontabilitetit (SNK), standardet ndërkombëtare të raportimit financiar (SNRF) dhe interpretimet përkatëse (interpretimet e komitetit të përhershëm) (IKP) dhe interpretimet e komitetit të raportimit financiar ndërkombëtar (IKRFN), të miratuara nga bordi i standardeve ndërkombëtare të kontabilitetit (BSNK - IASB).

19. “Shërbimet e kontabilitetit” janë shërbimet e mbajtjes dhe përgatitjes së librave kontabël, fiskalë dhe të pagave, të kontrollit dhe verifikimit të dokumentacionit kontabël, vlerësimet dhe analizat e kostos dhe kontabilitetit të drejtimit, vlerësimit dhe zbatimit të procedurave kontabël të përgatitjes së pasqyrave financiare, analiza financiare dhe këshillime përkatëse, si dhe shërbime të tjera të ngjashme.

20. “Shoqëri audituese” është personi juridik, i organizuar në formën e një shoqërie aksionare apo shoqërie me përgjegjësi të kufizuar, në përputhje me ligjin nr. 9901, datë 14.4.2008 “Për tregtarët dhe shoqëritë tregtare”, që regjistrohet sipas dispozitave të këtij ligji dhe ka në objektin e vet ushtrimin e veprimtarisë në fushën e auditimit ligjor.

21. “Shoqëri audituese e huaj” është personi juridik, i krijuar në përputhje me ligjin e një shteti tjetër, i cili është regjistruar apo licencuar në atë shtet për kryerjen e auditimit të pasqyrave financiare vjetore, individuale dhe/ose të konsoliduara të subjekteve.

22. “Shoqëri e lidhur me shoqërinë audituese” është çdo shoqëri tjetër, që lidhet me shoqërinë audituese nëpërmjet pronësisë, kontrollit, drejtimit të përbashkët.

KREU II MBIKËQYRJA PUBLIKE E PROFESIONIT TË EKSPERTIT KONTABËL TË REGJISTRUAR DHE SHOQËRIVE AUDITUESE

Neni 3

Mbikëqyrja publike

1. Mbikëqyrja e profesionit të ekspertëve kontabël të regjistruar dhe shoqërive audituese realizohet nga bordi i mbikëqyrjes publike, si drejtpërdrejt, duke mbikëqyrur të gjithë ekspertët kontabël të regjistruar dhe shoqëritë audituese, ashtu edhe përmes mbikëqyrjes së veprimtarisë së organizatës profesionale të ekspertëve kontabël të regjistruar.

2. Qëllimi i sistemit të mbikëqyrjes publike të ekspertëve kontabël të regjistruar dhe të shoqërive audituese është të rrisë sigurinë, që auditimet ligjore kryhen në një mjedis transparent, të kontrolluar dhe të kujdesshëm e në shërbim të interesit publik.

Neni 4

Bordi i mbikëqyrjes publike të ekspertëve kontabël të regjistruar

1. Bordi i mbikëqyrjes publike është organ kolegjal, i përbërë nga shtatë anëtarë, të emëruar nga Ministri i Financave me një mandat 4-vjeçar, me të drejtë rizgjedhjeje jo më shumë se dy herë radhazi.

2. Kryetari dhe 3 anëtarë të tij duhet të jenë persona, që nuk e ushtrojnë profesionin, të cilët kanë njohuri për auditimin ligjor dhe për fushat e lidhura me të.

3. Tre anëtarët e tjerë të bordit mund ta ushtrojnë profesionin në praktikë dhe duhet të kenë përvojë jo më pak se 5 vjet në auditim ligjor të pasqyrave financiare të shoqërive tregtare. Përrjashtimisht për mandatin e parë, dy anëtarë, që nuk e ushtrojnë profesionin dhe një anëtar, që e ushtron profesionin, emërohen për një mandat trevjeçar.

4. Anëtarët e bordit përzgjidhen bazuar në kritere të përcaktuara qartë dhe përmes një procedure transparente konkurrimi.

5. Financimi i veprimtarisë së bordit bëhet nga Buxheti i Shtetit dhe nga burime të tjera të ligjshme, të pavarura nga ndikimi i ekspertëve kontabël të regjistruar ligjorë apo shoqërive të auditimit.

6. Këshilli i Ministrave miraton:

- a) kriteret që duhet të përmbushin anëtarët e bordit;
- b) institucionet që kanë të drejtën e propozimit të kandidaturave pranë Ministrisë të Financave;
- c) procedurat e përzgjedhjes dhe të shkarkimit të anëtarëve të bordit;
- ç) rrethanat që mund të çojnë në shkarkim të anëtarëve të bordit;
- d) rregullat e funksionimit të bordit të mbikëqyrjes publike;
- dh) procedurat e shqyrtimit të kërkesave nga ana e bordit;
- e) shpërblimin e anëtarëve.

Neni 5

Të drejtat dhe detyrat e bordit të mbikëqyrjes publike

1. Bordi ka këto të drejta dhe detyra:

a) harton rregullat e funksionimit të Autoritetit të Certifikimit dhe të Autoritetit të Regjistrimit të ekspertëve kontabël dhe shoqërive audituese, të cilat i paraqiten për miratim autoriteteve të parashikuara në këtë ligj;

b) mbikëqyr, monitoron dhe vlerëson zbatimin e procedurave të certifikimit dhe regjistrimit të ekspertëve kontabël dhe të shoqërive audituese;

c) miraton formatin e regjistrit publik të ekspertëve kontabël dhe të shoqërive audituese, të regjistruara nga Autoriteti i Regjistrimit, si dhe mbikëqyr respektimin e rregullave, në lidhje me numrin e identifikimit të ekspertëve të regjistruar në regjistër;

ç) miraton kodin e etikës të ekspertëve kontabël e të shoqërive audituese, të përgatitur dhe të propozuar nga organizata profesionale e ekspertëve kontabël dhe mbikëqyr zbatimin e standardeve të këtij kodi;

d) mbikëqyr kontrollin e cilësisë, që realizohet nga organizata profesionale e ekspertëve kontabël;

dh) mbikëqyr programet dhe kualifikimin e vazhdueshëm profesional të ekspertëve kontabël;

e) miraton rregulloret e investigimit dhe të procedurave për marrjen e masave disiplinore;

ë) kur e gjykon të nevojshme, kryen investigime shtesë për ekspertët kontabël dhe shoqëritë audituese;

f) shqyrton dhe merr vendim për ankesat e bëra nga kandidatët, në lidhje me regjistrimin e tyre;

g) miraton dhe publikon programet vjetore të punës dhe raportet e veprimtarive të tij;

gj) shqyrton dhe merr vendim për rastet e shkeljeve disiplinore, që janë kompetencë e tij;

h) shqyrton dhe merr vendim për aspekte apo çështje të tjera, të parashikuara në këtë ligj, që janë brenda objektivit të veprimtarisë së tij.

2. Bordi miraton statutet e organizatave profesionale në fushën e kontabilitetit dhe mbikëqyr organizimin dhe funksionimin e tyre.

Neni 6

Raportimi

Bordi raporton te Ministri i Financave një herë në vit, brenda 3-mujorit të parë të vitit pasardhës, përmes një raporti me shkrim, në të cilin jepen me hollësi problemet e profesionit të ekspertit kontabël të regjistruar, zgjidhjet e dhëna dhe vendimet e marra.

KREU III

ORGANIZATA PROFESIONALE E EKSPERTËVE KONTABËL TË REGJISTRUAR DHE E SHOQËRIVE AUDITUESE

Neni 7

Organizimi i ekspertëve kontabël të regjistruar dhe i shoqërive audituese

1. Profesionistët kontabël, që e ushtrojnë veprimtarinë si ekspertë kontabël të regjistruar, grupohen në një organizim të vetëm profesional, që rregullon në mënyrë të drejtpërdrejtë organizimin e veprimtarisë së profesionit të ekspertit kontabël dhe që organizohet si person juridik, në përputhje me këtë ligj dhe statutin e tij. Për të gjitha ato çështje që nuk rregullohen në këtë ligj, zbatohen dispozitat e ligjit nr.8788, datë 7.5.2001 “Për organizatat jofitimprurëse”.

2. Organizata profesionale e ekspertëve kontabël të regjistruar grupon të gjithë ekspertët kontabël dhe shoqëritë audituese, vendase e të huaja, të cilat janë regjistruar të tilla, për kryerjen e auditimit ligjor të pasqyrave financiare, individuale dhe/ose të konsoliduara, të shoqërive tregtare në Republikën e Shqipërisë.

3. Përveç rregullave të parashikuara nga ky ligj, statuti i organizatës profesionale të ekspertëve kontabël të regjistruar përcakton rregulla të hollësishme për organizimin, kriteret e zgjedhjes apo emërimit, funksionimin dhe detyrat e organeve të tij. Statuti miratohet nga Ministri i Financave.

Neni 8

Organizimi i organizatës profesionale të ekspertëve kontabël

Organet e organizatës profesionale të ekspertëve kontabël janë:

- a) asambleja e përgjithshme e anëtarëve;
- b) këshilli drejtues;
- c) komiteti i kontrollit të brendshëm;
- ç) drejtori ekzekutiv.

Neni 9

Asambleja e përgjithshme e anëtarëve

1. Organi më i lartë vendimmarrës është asambleja e përgjithshme e anëtarëve, e cila mblidhet të paktën një herë në vit dhe, përveç kompetencave të tjera të parashikuara nga statuti, ka edhe këto kompetenca:

- a) me votim të fshehtë zgjedh kryetarin, zëvendëskryetarin dhe anëtarët e këshillit drejtues ndër individët, që kanë paraqitur kandidaturën për këto poste;
- b) zgjedh anëtarët e komitetit të kontrollit të brendshëm;
- c) miraton drejtorin ekzekutiv, sipas propozimit të këshillit drejtues.

2. Asambleja e përgjithshme e anëtarëve mblidhet në përputhje me dispozitat e ligjit nr.8788, datë 7.5.2001 "Për organizatat jofitimprurëse" dhe me dispozitat e statutit të organizatës profesionale të ekspertëve kontabël të regjistruar.

Neni 10

Këshilli drejtues

1. Këshilli drejtues kryen drejtimin e veprimtarisë, në pajtim me vendimet e asamblesë së përgjithshme të anëtarëve, së cilës edhe i raporton për veprimtarinë e tij.

Këshilli drejtues përbëhet nga 7 anëtarë dhe organizohet si më poshtë:

- a) kryetari;
- b) zëvendëskryetari;
- c) anëtarë përgjegjës për çështje të tjera, të ndara sipas fushës profesionale.

2. Kryetari i këshillit drejtues është organi që përfaqëson organizatën profesionale të ekspertëve kontabël. Ai ka, gjithashtu, kompetencën për thirrjen e asamblesë së përgjithshme të anëtarëve. Në rast pamundësie apo pengimi, zëvendëskryetari mund ta thërrasë mbledhjen e jashtëzakonshme të anëtarëve. Statuti mund të miratojë rregulla të tjera shtesë, për raste të tjera të thirrjes së asamblesë së përgjithshme.

3. Kryetari, zëvendëskryetari dhe anëtarët e tjerë të këshillit drejtues zgjidhen për një periudhë trevjeçare dhe me të drejtë rizgjedhjeje deri në dy herë radhazi.

4. Kriteret e përzgjedhjes së individëve, që emërohen në këshillin drejtues, të drejtat dhe detyrimet e këshillit drejtues, veprimtaria, si dhe procedurat e vendimmarrjes së këshillit drejtues rregullohen nga statuti i organizatës profesionale të ekspertëve kontabël.

Neni 11

Administrimi i veprimtarisë së organizimit profesional të ekspertëve kontabël

1. Administrimi i përditshëm i veprimtarisë kryhet nëpërmjet organeve administrative, që drejtohen nga drejtori ekzekutiv.

2. Funkcionet në organet e zgjedhura nuk rregullohen në bazë të ndonjë kontrate punësimi. Asambleja e përgjithshme e anëtarëve mund të miratojë shpërblime fikse për pjesëmarrje të personave të zgjedhur ose të emëruar në organet drejtuese.

3. Anëtarët e Autoritetit të Certifikimit, të Autoritetit të Regjistrimit dhe anëtarët e komisioneve apo komiteteve, të parashikuara nga ky ligj apo nga statuti i organizatës së ekspertëve kontabël, kanë të drejtën e një shpërblimi fikse për ditë të pjesëmarrjes në veprimtarinë e organit përkatës. Masa e këtij shpërblimi miratohet nga bordi, sipas propozimit të këshillit drejtues.

4. Anëtarët e organeve drejtuese të organizatës dhe të autoriteteve apo komisioneve, të përmendura në pikën 3 të këtij neni, gëzojnë të drejtën e rimbursimit të shpenzimeve të kryera prej tyre për shërbime në interes të organizatës, përkundërt paraqitjes së dokumenteve justifikuese përkatëse.

Neni 12

Kompetencat e organizatës profesionale të ekspertëve kontabël

1. Organizata profesionale e ekspertëve kontabël ka për objekt të veprimtarisë të sigurojë ushtrimin e profesionit, në përputhje të plotë me interesat e publikut, mbrojtjen e pavarësisë dhe të nderit të anëtarëve të tij.

2. Organizata profesionale e ekspertëve kontabël të regjistruar ka këto të drejta e detyra:

a) harton programet e përgatitjes dhe formimit profesional të hyrjes në profesion të kandidatëve, organizon dhe monitoron procesin e përgatitjes dhe të formimit profesional të hyrjes në profesion të kandidatëve;

b) harton dhe miraton rregullat e stazhit profesional, ku parashikohen hollësi për komisionin e stazhit, hyrjen në stazh, kualifikimin, ndjekjen, raportimin, kontrollin, testimin paraprak, raportimet periodike, si dhe drejtuesit e stazhit profesional;

c) harton programet e kualifikimit të vijueshëm të anëtarëve të tij, organizon kualifikimin në rastet kur e bën vetë atë, si dhe bën monitorimin e tyre në rastet kur ky program organizohet nga palë të treta;

ç) organizon sistemin e kontrollit të cilësisë së punës së ekspertëve kontabël dhe shoqërive audituese, kryen investigimin e nevojshëm të rasteve të shkeljeve të standardeve teknike dhe të etikës profesionale, si dhe zbaton rregulloret e investigimit e të disiplinës për aspekte brenda objektit të vet;

d) merr pjesë në organizatat ndërkombëtare të profesionit dhe udhëheq veprimtarinë për përmbushjen e detyrimeve, që rrjedhin nga anëtarësia;

dh) mban dhe përditëson regjistrin publik të ekspertëve kontabël të regjistruar dhe shoqërive audituese;

e) u paraqet organeve dhe institucioneve shtetërore çdo informacion për profesionin, në bazë të të cilit janë organizuar anëtarët e vet, si dhe ka detyrë të paraqitet kur thirret nga këto organe e autoritete për çështje që kanë të bëjnë me këtë profesion;

ë) siguron se anëtarët e tij zbatojnë praktikën më të mira në fushën e standardeve profesionale dhe të etikës;

f) kryen çdo detyrë tjetër, që është brenda objektit të veprimtarisë, të përcaktuar në këtë ligj dhe në statut;

g) përgatit aktet vetërregullatore dhe/ose akte të tjera nënligjore, në zbatim të këtij ligji, të cilat i nënshtrohen miratimit, sipas rastit, nga bordi dhe/ose Ministri i Financave.

3. Statuti parashikon organet e ngarkuara për plotësimin dhe ndjekjen e secilës prej detyrave dhe kompetencave të parashikuara në pikën 2 të këtij neni.

Neni 13

Burimet dhe përdorimi i të ardhurave

1. Pasuria e organizatës profesionale të ekspertëve kontabël përbëhet nga:

a) gjendja e trashëguar nga veprimtaria e Institutit të Ekspertëve Kontabël të Autorizuar;

b) të ardhurat nga kuotat, që paguajnë anëtarët e tij, të cilat përcaktohen sipas statutit;

c) shumat e arkëtuara për gjokat dhe penaltitetet e vendosura ndaj anëtarëve të tij, në rast të shkeljeve disiplinore;

ç) të ardhurat nga veprimtari të tilla, si publikimi i materialeve, kualifikimi i stazhierëve dhe i vijueshëm, si dhe shërbime që kryen për të tretët;

d) të ardhurat nga investimet e aktiveve;

dh) donacionet, projektet dhe të ngjashme, të dhëna në kuadër të zhvillimit të profesionit;

e) të ardhura të tjera nga burime të ligjshme.

2. Vendimmarrja për përdorimin e fondeve i nënshtrohet dispozitave të statutit të organizatës.

Neni 14

Procedurat e investigimit dhe të marrjes së masave disiplinore

1. Organizata profesionale e ekspertëve kontabël vë në funksionim një sistem efikas investigimi dhe monitorimi të disiplinës, si dhe respekton procedurat e kryerjes së investigimit, me qëllim zbulimin, korrigjimin dhe parandalimin e mangësive, që mund të vërehen gjatë kryerjes së shërbimit të auditimit ligjor dhe të shërbimeve profesionale të tjera dhe të lidhura nga ekspertët kontabël të autorizuar.

2. Rregulloret e investigimit dhe të procedurave për marrjen e masave disiplinore miratohen nga bordi, sipas propozimit të këshillit drejtues. Këshilli drejtues, kur kjo i kërkohet, vë në dispozicion stafin e vet dhe asiston bordin, me cilësinë e sekretariatit teknik.

3. Organizata profesionale e ekspertëve kontabël siguron publikimin e masave të marra dhe/ose sanksioneve të dhëna nga bordi ndaj ekspertëve kontabël ose shoqërive audituese.

KREU IV

EKSPERTI KONTABËL DHE SHOQËRIA AUDITUESE

SEKSIONI I

PËRGATITJA E EKSPERTËVE KONTABËL

Neni 15

Stazhi profesional dhe hyrja në profesion

1. Përpara se të certifikohet nga Autoriteti i Certifikimit, me qëllim regjistrimin nga Autoriteti i Regjistrimit, kandidati duhet të kryejë një stazh profesional, në kushtet e punësimit me kohë të plotë ose të pjesshme prej, të paktën, tre vitesh, për auditimin ligjor të pasqyrave financiare, individuale ose të konsoliduara. Të paktën dy të tretat e këtij stazhi duhet të kryhen pranë një eksperti kontabël ose një shoqërie audituese, të regjistruar në Republikën e Shqipërisë.

2. Kandidati duhet të vërtetojë se gjatë stazhit profesional me një ekspert kontabël të regjistruar apo një shoqëri audituese ka kryer jo më pak se 600 orë pune në vit, si i angazhuar në auditimin ligjor të pasqyrave financiare, individuale dhe/ose të konsoliduara.

3. Organizata profesionale e ekspertëve kontabël, nëpërmjet strukturave të veta, sipas kompetencave të parashikuara në statut, siguron që stazhi të kryhet pranë personave që japin garanci të mjaftueshme për përgatitjen teoriko-praktike të kandidatëve gjatë stazhit profesional.

4. Eksperti kontabël i regjistruar apo shoqëria audituese, që ka nënshkruar kontratë me kandidatin, i raporton organizatës profesionale të ekspertëve kontabël çdo gjashtë muaj për ecurinë e kandidatit dhe përfundimin e stazhit profesional.

5. Gjatë kryerjes së stazhit profesional kandidatët duhet të përmbushin detyrimet e stazhit dhe të punës, të thellojnë njohuritë profesionale, të jenë të bindur e të denjë për profesionin dhe t'i nënshtrohen çdo kontrolli nga ana e organizatës profesionale të ekspertëve kontabël për punën e tyre.

6. Përjashtohen nga detyrimi për stazhin profesional individët që, për pesëmbëdhjetë vjet, kanë qenë të angazhuar në veprimtari profesionale, të cilat u kanë dhënë mundësi të fitojnë përvojën e mjaftueshme në fushën e financës, të legjislacionit dhe të kontabilitetit e auditimit, nga të cilat të paktën për pesë vitet e fundit rresht kanë qenë të angazhuar, në mënyrë të konsiderueshme, në çështjet e kontabilitetit dhe auditimit, përkatësisht për një periudhë tre dhe dyvjeçare. Këta individë i nënshtrohen të njëjtit proces certifikimi, të cilit i nënshtrohen edhe kandidatët. Propozimi për çdo rast përjashtimi nga detyrimi i kryerjes së stazhit profesional bëhet me vendim të këshillit drejtues të organizatës profesionale të ekspertëve kontabël dhe miratohet nga bordi i mbikëqyrjes publike. Kopje e vendimit i dërgohet Autoritetit të Certifikimit.

7. Përjashtohen nga detyrimi për kryerjen e stazhit profesional shtetasit shqiptarë, të cilët kanë fituar titullin CPA apo ACCA në një shtet tjetër dhe që janë anëtarë të një organizmi profesional të ekspertëve kontabël të regjistruar në një shtet tjetër.

Neni 16

Kushtet e pranimit të kandidatëve në stazhin profesional

Për t'u pranuar në stazhin profesional, kandidati duhet të plotësojë këto kushte:

- a) të ketë zotësi të plotë për të vepruar;
- b) të mos jetë dënuar penalisht ose me dënim plotësues, të natyrës që vë në dyshim ndershmërinë e tij;
- c) të jetë jo më shumë se 60 vjeç;
- ç) të ketë fituar një diplomë të shkollës së lartë, niveli i së cilës të jetë i barasvlershëm, të paktën, me diplomën universitare të nivelit të dytë ose diplomat e barasvlershme me to, për çdonjërin nga degët e studimit në shkencat ekonomike, si kontabilitet, financë, administrim biznesi, ekonomik apo të barasvlershme me to.

SEKSIONI II

CERTIFIKIMI DHE REGJISTRIMI I EKSPERTËVE KONTABËL

Neni 17

Autoriteti i Certifikimit

1. Për të realizuar certifikimin e kandidatëve për ekspertë kontabël ngrihet dhe funksionon Autoriteti i Certifikimit, i cili është në varësi të Ministrit të Financave.
2. Autoriteti i Certifikimit përbëhet nga pesë anëtarë, të cilët emërohen për një periudhë trevjeçare. Kryetari i Autoritetit të Certifikimit emërohet nga Ministri i Financave. Anëtarët e Autoritetit të Certifikimit emërohen nga Ministri i Financave, sipas propozimeve të mëposhtme:
 - a) një përfaqësues i Ministrisë së Ekonomisë;
 - b) një përfaqësues i Këshillit Kombëtar të Kontabilitetit;
 - c) një përfaqësues i organizatës profesionale të ekspertëve kontabël të regjistruar;
 - ç) një përfaqësues nga organizatat profesionale të fushës së kontabilitetit.
3. Përfaqësuesit e parashikuar në pikën 2 të këtij neni duhet të jenë individë të diplomuar dhe të specializuar në fushat e ekonomisë dhe/ose të jurisprudencës, të lidhura me auditimin, kontabilitetin e financën, me përvojë jo më të vogël se pesë vjet, si dhe të kenë punuar në institucionin apo organizatën propozuese.
4. Autoriteti i Certifikimit merret me zbatimin e procedurave të testimit të njohurive të kandidatëve, të cilët kanë përmbushur kërkesat e stazhit profesional ose kanë fituar të drejtën të testohen për njohuritë e tyre teorike dhe praktike, pa pasur nevojë për kryerjen e stazhit profesional.
5. Rregullat e funksionimit të Autoritetit të Certifikimit dhe procedurat e testimit hartohen nga bordi dhe miratohen me udhëzim të Ministrit të Financave.
6. Organizata profesionale e ekspertëve kontabël, për organizimin e testimit, vë në dispozicion të Autoritetit të Certifikimit stafin e vet, me cilësinë e sekretarisë teknike.

Neni 18

Provimi i aftësive profesionale

1. Për të kryer testimin e aftësive profesionale, kandidatët duhet t'i drejtojnë kërkesë me shkrim Autoritetit të Certifikimit, e cila depozitohet pranë organizatës profesionale të ekspertëve kontabël. Ajo duhet të shoqërohet me dokumentet e nevojshme, që tregojnë përfundimin me sukses të stazhit profesional, ose që kandidati ka fituar të drejtën e përjashtimit nga kryerja e stazhit profesional.
2. Provimi i aftësisë profesionale përmban, të paktën, pesë teste të detyrueshme me shkrim, të cilat mbulojnë këto disiplina:
 - a) kontabilitet, raportim financiar dhe analizë e pasqyrave financiare;
 - b) e drejtë civile, e drejtë penale, legjislacioni tregtar dhe e drejtë e punës në Republikën e Shqipërisë, në masën që këto i interesojnë auditimit ligjor të pasqyrave financiare;
 - c) kodi i etikës për profesionistët kontabël, standardet ndërkombëtare të kontrollit të cilësisë, standardet ndërkombëtare të auditimit, direktivat e praktikave ndërkombëtare të auditimit, standardet ndërkombëtare të angazhimeve për të rishikuar, standardet ndërkombëtare të angazhimeve të dhënies së

sigurisë dhe standardet për çështje specifike, të publikuara nga Federata Ndërkombëtare e Kontabilistëve dhe të përkthyer, si dhe rregullat e organizimit të profesionit të ekspertit kontabël, të parashikuara në këtë ligj dhe në aktet në zbatim të tij;

ç) organizimi, drejtimi, administrimi dhe kontrolli i brendshëm i personave juridikë, përfshirë sistemet e informacionit dhe të informatikës;

d) legjislacioni fiskal në Republikën e Shqipërisë.

3. Çdonjëri nga këto teste vlerësohet me pikë nga 0 deri në 20. Vlerësimi i domosdoshëm për t'u kualifikuar për çdo test është nga 10 deri në 20 pikë. Çdo vlerësim i tri testeve të para më i ulët se 10 pikë është eliminues, duke ndërprerë vijimin e mëtejshëm të testimit në atë sezon, për ta rifilluar te provimi i radhës, në sezonin e ardhshëm, nëse kushtet dhe programi i provimeve nuk kanë pësuar ndryshime të konsiderueshme. Në rastet e tjera, kur vlerësimi është më i ulët se 10 pikë, testimi mund të rrijetet vetëm sezonin tjetër.

4. Sezoni i provimeve zhvillohet një herë në vit, në datat e miratuara nga Autoriteti i Certifikimit.

5. Kandidatët, që kanë fituar titullin "Kontabilist i miratuar", pasi kanë kaluar dy provimet e para, të parashikuara në shkronjat "a" e "b" të pikës 2 të këtij neni, kalojnë drejtpërdrejt në testin e tretë të provimit të aftësisë profesionale, nëse:

a) kryejnë stazhin profesional, sipas parashikimeve të këtij kreu;

b) kushtet dhe programi i dy provimeve të dhëna nuk kanë pësuar ndryshime të konsiderueshme, për shkak të ndryshimeve thelbësore të legjislacionit, të përfshirë në këto nënndarje.

6. Kostot administrative të organizimit të testimit përballohen nga kandidatët.

7. Shtetasit shqiptarë, të cilët kanë fituar titullin CPA apo ACCA në një shtet tjetër, përjashtohen nga detyrimi për kryerjen e provimit të aftësive profesionale për shkronjat "a", "c" e "ç" të pikës 2 të këtij neni. Përmbajtja e dokumentacionit, që paraqitet për regjistrimin e këtyre shtetasve në regjistrin publik të ekspertëve kontabël të regjistruar, përcaktohet nga bordi.

Neni 19

Autoriteti i Regjistrimit

1. Pranë organizatës profesionale të ekspertëve kontabël ngrihet dhe funksionon Autoriteti i Regjistrimit, i cili është një organ kolegjal, që merret me zbatimin e procedurave të regjistrimit të ekspertëve kontabël, vendas dhe të huaj dhe të shoqërive të auditimit, vendase dhe të huaja.

2. Autoriteti i Regjistrimit përbëhet nga pesë anëtarë, të cilët emërohen për një periudhë trevjeçare. Kryetari i Autoritetit të Regjistrimit emërohet nga ministri përgjegjës për ekonominë. Katër anëtarët emërohen nga ministri përgjegjës për ekonominë, sipas propozimeve të mëposhtme:

a) një përfaqësues i Ministrisë së Financave;

b) një përfaqësues i ministrisë që mbulon fushën e ekonomisë;

c) një përfaqësues i Ministrisë së Drejtësisë;

ç) një përfaqësues i organizatës profesionale të ekspertëve kontabël të regjistruar.

3. Anëtarët e Autoritetit të Regjistrimit duhet të jenë profesionistë të fushës së ekonomisë dhe/ose jurisprudencës dhe të kenë njohuri në fushën e kontabilitetit, auditimit dhe financës.

4. Rregullat e hollësishme të funksionimit të Autoritetit të Regjistrimit, të respektimit të periodicitetit të mbledhjeve, si dhe procedurat e marrjes së vendimeve dhe miratimit të regjistrimit, hartohen nga bordi dhe miratohen me udhëzim të ministrit përgjegjës për ekonominë.

5. Administrimi i procesit të regjistrimit bëhet nga organizata profesionale e ekspertëve kontabël. Kostot e regjistrimit përballohen nga kandidatët që kërkojnë regjistrim dhe nga të ardhurat e organizatës profesionale.

6. Autoriteti i Regjistrimit mbledhet një herë në dy muaj.

Neni 20

Regjistrimi i ekspertëve kontabël

1. Regjistrimi i ekspertëve kontabël është procesi i përfshirjes së tyre në regjistrin publik të ekspertëve kontabël të regjistruar.

2. Kërkesa e kandidatit për regjistrim i adresohet, me shkrim, Autoritetit të Regjistrimit, përmes organizatës profesionale të ekspertëve kontabël. Kërkesa duhet të shoqërohet me dokumentet e nevojshme, që tregojnë për përfundimin me sukses të provimeve të aftësisë profesionale, si dhe të deklaratës së lëshuar në përgjegjësinë personale të individit, për dhënien fund të papajtueshmërive, që kërkohen për ushtrimin e profesionit në praktikë dhe për garancitë etike e morale.

3. Ekspertët kontabël të regjistruar nga Autoriteti i Regjistrimit përfshihen në regjistrin publik, që mbahet dhe përditësohet nga organizata profesionale e ekspertëve kontabël. Vetëm pas kësaj përfshirjeje, ata kanë të drejtë të kryejnë veprimtarinë e auditimit ligjor të pasqyrave financiare, individuale dhe/ose të konsoliduara të shoqërive tregtare, si edhe të kryejnë shërbime të tjera apo shërbime të lidhura, kur ato nuk bien ndesh me kërkesat e parashikuara në këtë ligj, me standardet profesionale dhe me kodin e etikës.

Neni 21

Regjistrimi i shoqërive audituese

Autoriteti i Regjistrimit e regjistron një shoqëri audituese për kryerjen e auditimit ligjor të pasqyrave financiare, individuale dhe/ose të konsoliduara të shoqërive tregtare, që veprojnë në Republikën e Shqipërisë, në qoftë se shoqëria audituese plotëson kushtet e mëposhtme:

a) është themeluar në përputhje me kërkesat e ligjit “Për tregtarët dhe shoqëritë tregtare” dhe, kur është e huaj, është regjistruar në Qendrën Kombëtare të Regjistrimit;

b) shumica e të drejtave të votës në kapitalin e shoqërisë zotërohen nga shoqëri audituese, vendase ose të huaja, ose nga ekspertë kontabël;

c) shumica deri në maksimumin 75 për qind e anëtarëve të organit drejtues ose administrativ të shoqërisë audituese janë ekspertë kontabël, vendas ose të huaj, të njohur nga Autoriteti i Regjistrimit dhe të regjistruar në regjistrin publik të ekspertëve kontabël të regjistruar. Kur organi drejtues ose administrativ nuk ka më shumë se dy anëtarë, të paktën njëri prej këtyre anëtarëve duhet të plotësojë kushtet e përmendura në këtë shkronjë;

ç) shoqëria angazhon ekspertë kontabël, vendas ose të huaj, të cilët janë të regjistruar në regjistrin publik të ekspertëve kontabël;

d) shoqëria gëzon reputacion të mirë.

Neni 22

Regjistrimi i ekspertëve kontabël të huaj

1. Për t’u regjistruar në regjistrin publik, eksperti kontabël i huaj fillimisht i drejtohet, me një kërkesë me shkrim, për dhënien e provimit të aftësive profesionale, Autoritetit të Certifikimit, duke paraqitur dokumentacionin e nevojshëm, që tregon për titullin e marrë në një shtet tjetër.

2. Përmbajtja e dokumentacionit, që paraqitet për regjistrimin e ekspertit kontabël të huaj dhe të shoqërive të huaja audituese në regjistrin publik të ekspertëve kontabël të regjistruar, përcaktohet nga bordi dhe miratohet nga Ministri i Financave.

3. Këshilli drejtues i organizatës profesionale bën vlerësimin e pajtueshmërisë së kushteve të përgatitjes së ekspertit kontabël të huaj me kushtet e përgatitjes së ekspertëve kontabël të regjistruar vendas dhe i dërgon një raport Autoritetit të Regjistrimit.

4. Testi kryhet në gjuhën shqipe ose në atë angleze dhe mbulon njohuritë e mjaftueshme, që i nevojiten ekspertit kontabël të regjistruar ligjor, për ligjet dhe rregullat që zbatohen në Republikën e Shqipërisë në masën që ato kanë lidhje me kontabilitetin e auditimin ligjor.

Neni 23

Pezullimi i veprimtarisë dhe riregjistrimi në regjistrin publik të ekspertëve kontabël

1. Eksperti kontabël i autorizuar, me një kërkesë për pezullimin e ushtrimit të veprimtarisë, mund të kërkojë të tërhiqet përkohësisht nga ushtrimi i profesionit.

2. Kërkesa për pezullim i drejtohet me shkrim Autoritetit të Regjistrimit, përmes organizatës profesionale të ekspertëve kontabël. Ajo duhet të jetë e motivuar dhe të tregojë veprimtarinë e re, që do

të ndërmarrë i interesuari, si dhe periudhën për të cilën kërkohet pezullimi apo, kur kjo periudhë nuk mund të identifikohet, datën, në të cilën kërkohet të fillojë pezullimi.

3. Autoriteti i Regjistrimit e shqyrton kërkesën në mbledhjen më të parë dhe, nëse çmon se veprimtaria e tij e re nuk është e natyrës që u sjell dëm interesave etikë e moralë të profesionit, e miraton kërkesën dhe vendos fshirjen e përkohshme të të interesuarit nga regjistri publik i ekspertëve kontabël të regjistruar. Kopje e vendimit i dërgohet regjistrit publik të ekspertëve kontabël.

4. Eksperti kontabël i regjistruar ka të drejtë të nisë veprimtarinë e re përpara marrjes së vendimit nga Autoriteti i Regjistrimit, me kusht që të informojë për këtë, me shkrim, organizatën profesionale të ekspertëve kontabël, të paktën dhjetë ditë më parë, të ketë shlyer derdhjen e kuotave të tij dhe të ketë pushuar veprimtarinë si ekspert kontabël. Në rastet kur eksperti kontabël ka nisur veprimtarinë e re përpara marrjes së vendimit nga Autoriteti i Regjistrimit dhe Autoriteti i Regjistrimit vëren, gjatë shqyrtimit, se veprimtaria e tij e re është e natyrës, që u sjell dëm interesave etikë e moralë të profesionit, vendos çregjistrimin e ekspertit kontabël nga regjistri publik i ekspertëve kontabël.

5. Nga data e njoftimit të vendimit, që shpall fshirjen e përkohshme nga regjistri publik, i interesuari nuk është më anëtar i organizatës profesionale. Ai nuk mund të ushtrojë në emër të tij dhe nën përgjegjësinë e vet profesionin e ekspertit kontabël të regjistruar dhe as ta përdorë këtë titull.

6. Fshirja e përkohshme nga regjistri publik, me kërkesën e ekspertit kontabël, nuk ka efekt mbi procedurat disiplinore, të nisura për shkeljet e kryera prej tij përpara fshirjes.

7. Anëtari i tërhequr përkohësisht nga ushtrimi i profesionit mund të kërkojë riregjistrimin e tij. Riregjistrimi nga Autoriteti i Regjistrimit bëhet nëse eksperti kontabël ka përmbushur të gjitha detyrimet e kualifikimit të vijueshëm profesional edhe gjatë kohës kur ai nuk e ka ushtruar profesionin.

Neni 24

Heqja e së drejtës për të kryer shërbimin e auditimit ligjor për shoqëritë audituese dhe ekspertët kontabël

1. E drejta për ushtrimin e veprimtarisë si shoqëri audituese hiqet nga bordi, në rastet kur shkelen kushtet dhe/ose kur ndryshojnë rrethanat e parashikuara në këtë ligj, të cilat konsiderohen të domosdoshme për autorizimin e regjistrimit.

2. Bordi, në vend të heqjes së të drejtës për ushtrimin e veprimtarisë, mund të përcaktojë një kohë të arsyeshme, për të rregulluar gjendjen e pjesëmarrjes në kapital apo të pjesëmarrjes në organet drejtuese. Nëse edhe pas kalimit të afatit të përcaktuar nga bordi, gjendja nuk është rregulluar, bordi vendos heqjen e së drejtës për ushtrimin e profesionit dhe çregjistrimin nga regjistri publik.

3. E drejta për ushtrimin e profesionit të një eksperti kontabël të regjistruar apo të një shoqërie audituese, mund të hiqet, nëse reputacioni është dëmtuar ndjeshëm. Bordi, në vend të heqjes së të drejtës për ushtrimin e profesionit, mund të vendosë pezullimin e ushtrimit të profesionit, duke vënë në dispozicion një periudhë kohe të arsyeshme, e cila është e barabartë me pezullimin, një listë të kërkesave që duhen plotësuar, për të siguruar kthimin e reputacionit të mirë. Nëse edhe pas kalimit të afatit të përcaktuar nga bordi kërkesat nuk janë plotësuar, bordi vendos heqjen e së drejtës për ushtrimin e profesionit dhe çregjistrimin nga regjistri publik.

Neni 25

Kualifikimi i vijueshëm profesional

1. Ekspertët kontabël i nënshtrohen kualifikimit të vijueshëm profesional, i cili është i detyrueshëm dhe zgjat, të paktën, 40 orë. Periodiciteti i kryerjes së kualifikimit të vijueshëm profesional vendoset nga organizata profesionale.

2. Përveç organizimit nga organizata profesionale e ekspertëve kontabël, kurset për kualifikimin e vijueshëm profesional mund të organizohen edhe nga:

a) institucione të arsimit të lartë;

b) qendra të tjera të kualifikimit profesional, të cilat kanë mjediset dhe personelin e duhur për garantimin e një kualifikimi cilësor, në përputhje me programet e miratuara për kualifikimin e vazhdueshëm profesional;

c) shoqëri audituese, të cilat kanë kapacitete për të organizuar kualifikimin për të punësuarit e vet.

3. Institucionet e arsimit të lartë, qendrat e kualifikimit profesional dhe punëdhënësit e përmendur në shkronjën “c” të pikës 2 të këtij neni, që dëshirojnë të organizojnë kurset e kualifikimit të vijueshëm profesional, vënë në dijeni bordin e mbikëqyrjes publike për këtë fakt, përpara fillimit të kësaj veprimtarie, në përputhje me vendimin e marrë në organet e veta vendimmarrëse.

4. Në përfundim të çdo kursi, eksperti kontabël pajiset me vërtetimin e plotësimit të detyrimit, si dhe të vlerësimit të marrë. Vërtetimi depozitohet pranë organizatës profesionale të ekspertëve kontabël.

5. Këshilli drejtues i organizatës profesionale të ekspertëve kontabël miraton mënyrën e monitorimit dhe të vlerësimit të procesit të kualifikimit të vijueshëm të anëtarëve të tij. Si pjesë e procesit të vlerësimit, këshilli drejtues mund të miratojë organizimin e testimit të njohurive të marra gjatë kualifikimeve të vijueshme, i cili duhet të bëhet jo më shpesh se një herë në tre vjet dhe jo më rrallë se një herë në pesë vjet.

6. Në përfundim të një procedure të nisur monitorimi, organizata profesionale e ekspertëve kontabël publikon rezultatet e monitorimit dhe ia dërgon ato bordit të mbikëqyrjes publike. Bordi i shqyrton dhe merr vendim për masat që duhen ndërmarë për rregullimin e situatës. Bordi, gjithashtu, merr vendim për pezullimin e ushtrimit të profesionit nga ekspertët kontabël, që nuk kanë arritur të marrin provimet e lidhura me kualifikimin e vijueshëm, apo çregjistrimin e ekspertëve kontabël, të cilët kanë depozituar vërtetime të pavërteta për kryerjen e kurseve të kualifikimit të vazhdueshëm. Kopje të vendimeve i dërgohen Autoritetit të Regjistrimit, i cili reflekton ndryshimet në regjistër.

Neni 26

Çregjistrimi i ekspertëve kontabël nga regjistri publik

1. Eksperti kontabël fshihet përfundimisht nga regjistri publik i ekspertëve kontabël në rastet kur:

a) heq dorë nga e drejta për ushtrimin e profesionit. Heqja dorë bëhet nëpërmjet deklaratimit me shkrim, kopje të të cilit i dërgohen organizatës profesionale dhe bordit të mbikëqyrjes publike;

b) konstatohen parregullsi në:

i) dokumentet e nevojshme, të lidhura me provimet e aftësisë profesionale;

ii) deklaratimet, të cilat rezultojnë të pavërteta, në lidhje me dhënien fund të papajtueshmërive, që kërkojnë për ushtrimin e profesionit në praktikë dhe për garancitë etike e morale, të dorëzuara në çastin e bërjes së kërkesës për regjistrimin e parë në regjistrin publik;

iii) dokumentet e në faktet e deklaruara gjatë procedurave të mundshme të pezullimit të përkohshëm të ushtrimit të profesionit;

c) në përfundim të një procedure disiplinore ndaj tij, është marrë masa disiplinore e çregjistrimit nga regjistri publik;

ç) është hequr e drejta e ushtrimit të profesionit, për shkak të ndryshimit të kushteve të domosdoshme për regjistrim, të lidhura me pjesëmarrjen në kapital;

d) për shkak të shkeljeve dhe masave disiplinore të përsëritura, reputacioni i të regjistruarit është cenuar ndjeshëm;

dh) në përputhje me dispozitat e këtij ligji, bordi ka vendosur çregjistrimin nga regjistri publik;

e) individi i regjistruar në regjistrin e ekspertëve kontabël arrin moshën 65 vjeç, me përjashtim të ekspertëve kontabël me titull shkencor “Doktor i shkencave” apo me titull më të lartë, të cilët çregjistrohen kur arrijnë moshën 68 vjeç;

ë) vdes.

2. Individi, që ka mbajtur më parë titullin profesional të ekspertit kontabël, përfiton automatikisht, nga e drejta e mbajtjes së titullit profesional të kontabilistit të miratuar.

3. Shoqëria audituese fshihet përfundimisht nga regjistri publik i ekspertëve kontabël në rastet kur:

a) përfundon afatin e ushtrimit të veprimtarisë së parashikuar në statutin e vet;

b) e drejta për ushtrimin e veprimtarisë si shoqëri auditimi hiqet nga bordi.

SEKSIONI III REGJISTRI PUBLIK

Neni 27

Organizimi i regjistrimit publik

1. Organizata profesionale e ekspertëve kontabël është struktura përgjegjëse që siguron:
 - a) mbajtjen dhe përditësimin e regjistrimit publik të ekspertëve kontabël dhe shoqërive audituese;
 - b) identifikimin e ekspertit kontabël dhe të shoqërisë audituese në regjistrin publik, me një numër individual.
2. Informacioni për regjistrimin mbahet në format elektronik dhe vihet në dispozicion të publikut nëpërmjet publikimit në faqen zyrtare të organizatës profesionale të ekspertëve kontabël. Për nevojat e veta, organizata profesionale e ekspertëve kontabël mund të mbajë edhe regjistër në formë dokumentare.
3. Formatimi i regjistrimit publik të ekspertëve kontabël të autorizuar miratohet nga bordi dhe ai duhet të parashikojë të paktën dy seksione, të organizuara, përkatësisht, si seksioni i ekspertëve kontabël dhe seksioni i shoqërive të auditimit.
4. Të dhënat e regjistrimit i vihen në dispozicion Qendrës Kombëtare të Licencimit, në përputhje me legjislacionin e fushës.

Neni 28

Seksioni i ekspertëve kontabël

- Seksioni i ekspertëve kontabël në regjistrin publik duhet të përmbajë, të paktën, informacionin e mëposhtëm, në lidhje me ekspertin kontabël:
- a) emrin, adresën dhe numrin e regjistrimit;
 - b) sipas rastit, emrin, adresën dhe numrin e regjistrimit të shoqërisë audituese, që ka punësuar ekspertin kontabël të autorizuar, ose me të cilën ai ka lidhje ortakërie apo një formë lidhjeje tjetër;
 - c) të gjitha regjistrimet e tjera si ekspert kontabël i regjistruar në vende të tjera, duke përfshirë emrin e Autoritetit të Regjistrimit, numrin dhe datat e regjistrimit;
 - ç) masat disiplinore, të dhëna në adresë të ekspertit kontabël apo vendimet e mëparshme, të marra nga autoritetet përgjegjëse, të cilat kanë pasur pasoja në regjistër;
 - d) shkarkimet e mëparshme.

Neni 29

Seksioni i shoqërive audituese

- Seksioni i shoqërive audituese në regjistrin publik duhet të përmbajë, të paktën, informacionin e mëposhtëm:
- a) emrin, adresën dhe numrin e regjistrimit;
 - b) formën ligjore;
 - c) informacione kontakti, të dhëna për administratorët kryesorë të subjektit apo për personin kryesor të kontaktit, si dhe adresën e faqes së internetit;
 - ç) adresën e çdo zyre në Shqipëri;
 - d) emrin dhe numrin e regjistrimit të të gjithë ekspertëve kontabël, të punësuar nga kjo shoqëri auditimi dhe/ose të atyre që kanë lidhje ortakërie ose çdo lidhje tjetër me këtë shoqëri;
 - dh) emrat dhe adresat e biznesit të të gjithë ortakëve ose aksionarëve të shoqërisë;
 - e) emrat dhe adresat e biznesit të të gjithë anëtarëve të organeve të drejtimit ose administrimit;
 - ë) nëse është e mundur, anëtarësinë e rrjetit;
 - f) të gjitha regjistrimet e tjera si shoqëri audituese me autoritetet kompetente në vende të tjera, përfshirë Autoritetin e Regjistrimit dhe numrin e datat e regjistrimit;
 - g) vendimet e mëparshme, të marra nga autoritetet përgjegjëse, në adresë të shoqërisë audituese, të ekspertëve kontabël të punësuar prej saj, të cilat kanë pasur pasoja në regjistër;
 - gj) rastet e mëparshme të zgjidhjes së parakohshme të kontratës për auditim ligjor.

Neni 30

Përditësimi i informacionit të regjistrin publik

1. Eksperti kontabël dhe shoqëria audituese njoftojnë organizatën profesionale të ekspertëve kontabël për ndryshimin e informacionit të detyrueshëm për publikim dhe të regjistruar në regjistrin publik sapo ndryshimi të ketë ndodhur.

2. Regjistri publik përditësohet menjëherë pas marrjes së njoftimit për ndryshimin e informacioneve të detyrueshme për publikim.

Neni 31

Gjuha e regjistrin publik

Regjistri publik mbahet dhe publikohet në gjuhën shqipe.

SEKSIONI IV

ETIKA PROFESIONALE, PAVARËSIA DHE SEKRETI PROFESIONAL

Neni 32

Etika profesionale dhe papajtueshmëritë

1. Organizata profesionale e ekspertëve kontabël siguron që anëtarët t'i nënshtrohen zbatimit të rregullave të parashikuara në kodin e etikës, i cili hartohet në pajtim me kodin e etikës së Federatës Ndërkombëtare të Kontabilistëve dhe miratohet nga bordi.

2. Eksperti kontabël i regjistruar mund ta ushtrojë profesionin:

a) në mënyrë individuale;

b) i grupuar në shoqëri audituese;

c) i punësuar te një tjetër ekspert kontabël i regjistruar.

3. Funkcioni i ekspertit kontabël të regjistruar është i papajtueshëm me çdo angazhim, si i punësuar, me përjashtim të:

a) rasteve të parashikuara në pikën 2 të këtij neni;

b) ushtrimit të veprimtarisë së mësimdhënies me kohë të pjesshme;

c) pjesëmarrjes në seminare, konferenca apo veprimtari të ngjashme me to.

Neni 33

Konflikti i interesit

1. Eksperti kontabël ose shoqëria audituese, gjatë kryerjes së auditimit, duhet të jenë të pavarur nga personi juridik që auditohet dhe nuk duhet të marrin pjesë në vendimmarrjen e këtij entiteti.

2. Nëse pavarësia e ekspertit kontabël ose shoqërisë audituese cenohet nga kërcënime apo presione, që lidhen me konflikte interesi, si interesi personal, familjariteti, frikësimi apo mosbesimi, eksperti kontabël i regjistruar ose shoqëria audituese duhet të marrë masa mbrojtëse, me qëllim që të pakësojë ose të eliminojë efektin e këtyre rrethanave në kryerjen e auditimit.

3. Nëse shkalla e kërcënimeve, në krahasim me masat mbrojtëse, është e tillë, që të rrezikohet pavarësia, eksperti kontabël i regjistruar ose shoqëria audituese duhet të heqë dorë nga auditimi ligjor.

4. Eksperti kontabël ose shoqëria audituese nuk duhet ta kryejnë auditimin nëse ekziston ndonjë lidhje, e drejtpërdrejtë ose e tërthortë, financiare, biznesi ose punësimi ndërmjet ekspertit, shoqërisë audituese, apo rrjetit të audituesve dhe personit juridik që auditohet, kur kjo lidhje shkel pavarësinë e ekspertit kontabël ose të shoqërisë audituese.

5. Për shoqëritë e listuara në bursë, bankat ose shoqëritë e sigurimeve, eksperti kontabël ose shoqëria audituese mund të ofrojë, përveç auditimit, edhe shërbime të tjera, që nuk janë auditim ligjor, për sa kohë që një palë e tretë objektive, e arsyeshme dhe e mirinformuar nuk arrin në përfundimin se shkelet pavarësia. Ankimimi, në rast shkeljeje, bëhet pranë bordit, i cili, pasi e shqyrton rastin, vendos për pretendimin e ngritur dhe urdhëron veprimet e mëtejshme.

6. Organizata profesionale e ekspertëve kontabël siguron që ekspertët kontabël ose shoqëritë audituese dokumentojnë në fletët e tyre të punës së auditimit të gjitha kërcënimet/presionet e konsiderueshme, që lidhen me pavarësinë e tyre, si dhe masat e marra për shmangien e tyre.

Neni 34

Konfidencialiteti dhe sekreti profesional

1. Informacionet dhe dokumentet që përdoren ose mbi të cilat merret dijëni nga eksperti kontabël apo shoqëria audituese, gjatë kryerjes së auditimit, mbrohen nga konfidencialiteti dhe sekreti profesional.

2. Rregullat e konfidencialitetit dhe të ruajtjes së sekretit profesional, që lidhen me ekspertët kontabël ose shoqëritë audituese, nuk përbëjnë pengesë për zbatimin e dispozitave të këtij ligji, për zbatimin e standardeve dhe as bien ndesh me kërkesat ligjore të ligjeve të tjera, të zbatueshme në Republikën e Shqipërisë, të cilat parashikojnë marrjen e këtyre informacioneve edhe kur ato mbrohen si konfidenciale dhe pjesë të sekretit profesional.

3. Në rast zëvendësimi të ekspertit kontabël ose të shoqërisë audituese, pa përfunduar angazhimi i auditimit ligjor, eksperti kontabël i regjistruar apo shoqëria audituese e zëvendësuar duhet të vënë në dispozicion të pasardhësit të gjithë evidencën përkatëse të auditimit të mbledhur, në lidhje me atë entitet.

4. Eksperti kontabël ose shoqëria audituese, që ka ndërprerë angazhimet në një auditim të caktuar, ose një ish-ekspert kontabël ose ish-shoqëri audituese, do të vazhdojnë t'u nënshtrohen dispozitave të pikave 1 e 2 të këtij neni, në lidhje me auditimet e kryera.

Neni 35

Pavarësia dhe objektiviteti

1. Pronarët, ortakët ose aksionarët e një shoqërie audituese, si dhe anëtarët e organeve të drejtimit apo administrimit të kësaj shoqërie ose të një shoqërie të lidhur me të, nuk lejohen të ndërhyjnë në kryerjen e një auditimi në çdo lloj mënyre, që rrezikon pavarësinë dhe objektivitetin e ekspertit kontabël, që kryen auditimin.

2. Në funksion të ushtrimit të detyrës së vet, eksperti kontabël i regjistruar ka të drejtën:

- a) të marrë dokumente dhe të bëjë verifikime;
- b) të marrë deklaratat nga drejtuesit e shoqërisë për çështjet që i nevojiten;
- c) të heqë dorë apo të refuzojë kryerjen e një angazhimi.

Neni 36

Rregullat e auditimit

1. Rregullat për programin dhe kohën e punës përcaktohen në mënyrë që të sigurohet respektimi i standardeve ndërkombëtare të auditimit.

2. Për shërbimin e auditimit ligjor, organizata profesionale e ekspertëve kontabël i paraqet bordit treguesit, në lidhje me afatet kohore të auditimit ligjor.

SEKSIONI V

STANDARDET E PUNËS DHE RAPORTIMI I AUDITIMIT

Neni 37

Standardet e auditimit

1. Ekspertët kontabël dhe shoqëritë audituese i kryejnë auditimet në përputhje me standardet ndërkombëtare të auditimit.

2. Standardet ndërkombëtare të auditimit përkthehen dhe publikohen në gjuhën shqipe, në pajtim me politikën e përkthimit të bordit të standardeve ndërkombëtare të auditimit e dhënies së sigurisë (IAASB) të Federatës Ndërkombëtare të Kontabilistëve (IFAC).

3. Organizata profesionale e ekspertëve kontabël siguron përkthimin, përditësimin dhe publikimin në kohën e duhur të standardeve ekzistuese, të standardeve të reja ose atyre të rishikuara.

Neni 38

Sistemet e dhënies së sigurisë për cilësinë

1. Sistemi i dhënies së sigurisë për cilësinë përfshin dy hallka:
 - a) kontrollin e cilësisë, që organizohet brenda shoqërisë së auditimit;
 - b) kontrollin e cilësisë, që organizohet nga organizata profesionale e ekspertëve kontabël, përmes një komiteti të pavarur, në përbërje të të cilit ka ekspertë kontabël dhe persona që nuk e ushtrojnë profesionin.
2. Eksperti kontabël ose shoqëria audituese i nënshtrohet një sistemi kontrolli, që ka për qëllim dhënien e sigurisë për cilësinë e punës audituese.
3. Personat që ushtrojnë kontrollin e cilësisë duhet të jenë ekspertë kontabël, ndërsa anëtarët e komitetit të cilësisë mund të jenë edhe persona, që nuk e ushtrojnë profesionin dhe persona të tjerë, që kanë arsimin profesional e përvojën e duhur në auditim e raportim financiar, të kombinuara këto me kualifikimin specifik për kontrollin e cilësisë.
4. Sistemi i dhënies së sigurisë për cilësinë organizohet në mënyrë që të jetë i pavarur nga ekspertët kontabël të regjistruar apo shoqëritë e auditimit, të cilat kontrollohen. Ky sistem i nënshtrohet mbikëqyrjes publike, sipas shkronjës “d” të nenit 5 të këtij ligji.
5. Rregulla të hollësishme për organizimin e kontrollit të cilësisë, për përbërjen dhe mënyrën e përzgjedhjes së komitetit të cilësisë, si dhe dhënien e sigurisë për cilësinë miratohen nga bordi, sipas propozimit të këshillit drejtues të organizatës profesionale të ekspertëve kontabël.

Neni 39

Procedura e kontrollit të cilësisë

1. Përzgjedhja e personave për kontrollin e cilësisë bëhet në bazë të një procedure objektive, e cila jep garanci se nuk ka konflikt interesash ndërmjet kontrollorit dhe ekspertit kontabël ose shoqërisë audituese që kontrollohet.
2. Kontrolli i cilësisë realizohet përmes kontrollit të dosjeve të përzgjedhura të auditimit dhe përfshin një vlerësim të përputhshmërisë me standardet e zbatueshme të auditimit dhe kërkesat e etikës e pavarësisë, të cilësisë dhe sasisë së burimeve të shpenzuara, të tarifave të auditimit të ngarkuara dhe një vlerësim të sistemit të brendshëm të kontrollit të cilësisë të shoqërisë audituese.
3. Kontrolli i cilësisë shoqërohet me përgatitjen e një raporti nga kontrolluesi, që përmban konkluzionet kryesore të kontrollit të kryer. Ky raport i paraqitet komitetit të kontrollit të cilësisë. Në rast mosmarrëveshjeje ndërmjet kontrolluesit dhe të kontrolluarit, arbitrimi bëhet nga komisioni i kontrollit të cilësisë, pasi eksperti kontabël i kontrolluar ka paraqitur, formalisht, qëndrimet e tij.
4. Kontrolli i cilësisë kryhet, të paktën, një herë në çdo katër vjet. Për ekspertët e rinj kontabël, me jo më shumë se 5 vjet punë në profesion, ky kontroll kryhet, të paktën, një herë në dy vjet. Auditimi i shoqërive, që janë përshkruar në shkronjën “a” të nenit 41 të këtij ligji, është subjekt i kontrollit të cilësisë çdo tre vjet.
5. Rezultatet e përgjithshme të sistemit të kontrollit të cilësisë publikohen çdo vit nga organizata profesionale e ekspertëve kontabël.
6. Rekomandimet e komitetit të kontrollit të cilësisë duhet të ndiqen për t’u zbatuar nga eksperti kontabël ose shoqëria e auditimit brenda një periudhe kohe të arsyeshme.

Neni 40

Përgjegjësia për dëmin e shkaktuar

Eksperti kontabël ose shoqëria audituese, gjatë ushtrimit të auditimit, ka përgjegjësinë dhe detyrimin e zhdëmtimit të pasojave financiare, që vijnë drejtpërdrejt nga gabimi apo faji i tij në punë. Pa iu shmangur kësaj përgjegjësie, eksperti kontabël apo shoqëria audituese, nga njëra anë dhe klienti i tyre, nga ana tjetër, mund të bien dakord për kufizimin e kësaj përgjegjësie, deri në një shumë të paracaktuar, në letrën e tyre të angazhimit.

KREU V
AUDITIMI LIGJOR I PASQYRAVE FINANCIARE, EMËRIMI DHE SHKARKIMI I
EKSPERTIT KONTABËL DHE SHOQËRISË AUDITUESE

Neni 41

**Personat juridikë që detyrohen për auditimin ligjor
të pasqyrave financiare**

Detyrohen të kryejnë auditimin ligjor të pasqyrave financiare vjetore, përpara publikimit të tyre, nga ekspertë kontabël ose shoqëri audituese:

a) të gjitha shoqëritë tregtare, pavarësisht nga forma e tyre, të cilat zbatojnë standardet ndërkombëtare të raportimit financiar;

b) të gjitha shoqëritë aksionare, të cilat zbatojnë për raportimin financiar standardet kombëtare të kontabilitetit;

c) shoqëritë me përgjegjësi të kufizuar, të cilat zbatojnë për raportimin financiar standardet kombëtare të kontabilitetit, kur në mbyllje të periudhës kontabël tejkalojnë dy prej tre treguesve të mëposhtëm:

i) totali i aktiveve të bilancit, në mbyllje të periudhës kontabël përkatëse, arrin ose e kalon shumën prej 40 milionë lekësh;

ii) shuma e të ardhurave nga veprimtaria ekonomike (qarkullimi) në atë periudhë kontabël arrin ose e kalon shumën prej 30 milionë lekësh;

iii) ka, mesatarisht, 30 të punësuar gjatë periudhës kontabël.

Neni 42

Emërimi i ekspertëve kontabël ose i shoqërive audituese

1. Eksperti kontabël ose shoqëria audituese emërohet çdo vit, nga mbledhja e përgjithshme e aksionarëve, për shoqëritë aksionare, ose nga asambleja e ortakëve, për shoqëritë me përgjegjësi të kufizuar.

2. Shoqëritë tregtare, të parashikuara në shkronjat “a” e “b” të nenit 41 të këtij ligji, janë të detyruara të emërojnë për auditimin ligjor, të paktën, dy ekspertë kontabël, kur këta janë persona fizikë.

3. Procedurat e emërimit të ekspertit kontabël apo shoqërisë audituese përcaktohen, sipas rastit, nga rregullat për qeverisjen e shoqërive tregtare, nga ligjet përkatëse, kur shoqëritë veprojnë në sektorë të rregulluar, ose nga autoritetet e mbikëqyrjes së tyre apo aktet që rregullojnë funksionimin e tyre.

4. Autoritetet mbikëqyrëse të tregjeve të rregulluara me ligj të veçantë mund të parashikojnë kritere apo provime shtesë, që duhet të përmbushin ekspertët kontabël, që auditojnë personat juridikë të mbikëqyrur prej tyre.

5. Eksperti kontabël, që është person fizik dhe eksperti kontabël apo ortaku kryesor në një shoqëri audituese, që është eksperti kontabël përgjegjës për kryerjen e auditimit, në emër të shoqërisë së auditimit, duhet të zëvendësohet për kryerjen e auditimit brenda një periudhe maksimale prej 7 vjetësh nga data e caktimit si ekspert kontabël dhe mund të rimarrë pjesë në auditimin e shoqërisë pas mbarimit të një afati kohor prej, të paktën, dy vjetësh.

6. Dispozitat e parashikuara në këtë nen nuk zbatohen në rast se ligji i fushës, që rregullon persona juridikë të caktuar, ka parashikuar ndryshe.

Neni 43

Auditimi ligjor i pasqyrave financiare të konsoliduara

Në rastin e auditimit ligjor të pasqyrave financiare të konsoliduara të një grupi sipërmarrjesh, eksperti kontabël i regjistruar i grupit:

a) mban përgjegjësi të plotë për auditimin e pasqyrave financiare të konsoliduara dhe raportin e auditimit;

b) kryen kontroll të auditimit, të bërë nga ekspertët kontabël të regjistruar të tjerë, si edhe në një juridiksion tjetër, për qëllimet e auditimit të grupit.

Neni 44

Shkarkimi dhe dorëheqja

1. Eksperti kontabël ose shoqëria audituese mund të shkarkohet përpara përfundimit të auditimit vetëm kur ka arsye të mjaftueshme. Papajtueshmëria e mendimeve për trajtimet kontabël, raportimin financiar ose procedurat e auditimit nuk përbëjnë arsye të vlefshme për shkarkim.

2. Bordi i mbikëqyrjes publike është autoriteti i shqyrtimit të ankesave për rastet e shkarkimit të ekspertit kontabël të regjistruar apo shoqërisë audituese nga shoqëria tregtare, përpara përfundimit të angazhimit të auditimit ligjor.

3. Shoqëria tregtare, subjekt i auditimit të pasqyrave financiare dhe eksperti kontabël apo shoqëria audituese, subjekt i një kërkesë për shkarkim, në mënyrë të pavarur, informojnë organizatën profesionale të ekspertëve kontabël dhe japin shpjegime të mjaftueshme për arsyet. Për çdo rast të paraqitur, organizata profesionale i përgatit një relacion bordit, për shkarkimin gjatë kohës së angazhimit të auditimit ligjor.

4. Eksperti kontabël ose shoqëria audituese, në rast dorëheqjeje nga detyra e auditimit, njofton, me shkrim, organizatën profesionale për motivet e dorëheqjes. Në këtë rast, funksionin dhe përgjegjësinë e ndërmjetësimit apo shqyrtimit të konfliktit për rastin e ka kryetari i këshillit drejtues të organizatës profesionale të ekspertëve kontabël.

KREU VI

DISPOZITA TË POSAÇME PËR AUDITIMIN E DETYRUESHËM TË SHOQËRIVE TË LISTUARA, BANKAVE DHE SHOQËRIVE TË SIGURIMEVE

Neni 45

Raporti për transparencën

Eksperti kontabël ose shoqëria audituese, që kryen auditimin ligjor të shoqërive të listuara në bursë, bankave dhe shoqërive të sigurimeve, brenda tre muajve pas mbylljes së vitit financiar, publikon në faqen zyrtare të internetit një raport për transparencën, ku përfshihen të paktën:

- a) përshkrimi i strukturës ligjore dhe i pronësisë;
- b) përshkrimi i rrjetit, kur shoqëria e auditimit i përket një rrjeti;
- c) përshkrimi i strukturës drejtuese të shoqërisë së auditimit;
- ç) përshkrimi i sistemeve të kontrollit të brendshëm të cilësisë së shoqërisë së auditimit;
- d) informacioni për kryerjen e kontrollit të fundit të cilësisë;
- dh) lista e shoqërive të listuara në bursë, të bankave dhe shoqërive të sigurimit, për të cilat është kryer auditimi ligjor gjatë vitit të fundit nga shoqëria e auditimit;
- e) deklaratat e praktikave të pavarësisë së shoqërisë audituese;
- ë) deklarata për politikën e ndjekur nga shoqëria audituese, për kualifikimin e vijueshëm profesional të ekspertëve kontabël të regjistruar;
- f) informacioni financiar, në të cilin tregohet rëndësia e shoqërisë së auditimit, përfshirë qarkullimin, gjithsej, të ndarë në të ardhurat nga tarifat e auditimit ligjor, nga tarifat për shërbimet e tjera, nga këshillimet tatimore dhe shërbime të tjera joauditimi.

Neni 46

Komiteti i auditimit të personave juridikë

1. Shoqëritë e listuara në bursë, bankat dhe shoqëritë e sigurimeve kanë një komitet auditimi, të përbërë nga disa ose të gjithë anëtarët joekzekutivë të organit administrativ ose anëtarët e bordit mbikëqyrës të entitetit. Të paktën njëri nga anëtarët e komitetit të auditimit është i pavarur dhe ka njohuri në kontabilitet ose auditim.

2. Komiteti i auditimit, përveç sa parashikohet në dispozita të tjera, kryen këto funksione:

- a) monitoron proceset e raportimit financiar;
- b) monitoron efektshmërinë e kontrollit të brendshëm të entitetit, auditimin e brendshëm;
- c) angazhon dhe mbikëqyr auditimin ligjor;
- ç) rishikon dhe monitoron pavarësinë e ekspertit kontabël ose të shoqërisë audituese.

3. Eksperti kontabël ose shoqëria audituese raportojnë çdo vit përpara komitetit të auditimit për çështjet më të rëndësishme, që dalin nga auditimi ligjor dhe ndihmojnë komitetin në përmbushjen e detyrave të tij.

4. Shkronjat “b” dhe “c” të pikës 2 të këtij neni nuk janë të zbatueshme për bankat e licencuara në Republikën e Shqipërisë.

Neni 47 **Pavarësia**

1. Përveç detyrimeve të tjera, të parashikuara në këtë ligj, eksperti kontabël ose shoqëria audituese, që kryen auditimin ligjor të pasqyrave financiare të një shoqërie të listuar, banke apo shoqërie sigurimesh:

- a) konfirmon çdo vit pavarësinë e vet nga subjekti i audituar;
- b) paraqet çdo vit pranë komitetit të auditimit shërbimet e tjera shtesë, që i ka ofruar subjektit të audituar;
- c) diskuton me komitetin e auditimit mbi kërcënimet për pavarësinë dhe masat mbrojtëse të sigurisë, të marra kundrejt tyre.

2. Eksperti kontabël ose ortaku kryesor në auditim, që kryen auditimin ligjor, në emër të një shoqërie audituese, nuk ka të drejtë të pranojë ose të kryejë funksione të rëndësishme drejtimi në entitetin e audituar, pa kaluar një periudhë kohe prej, të paktën, dy vjetësh nga koha kur ka dhënë dorëheqjen si ekspert kontabël ose drejtues kryesor në auditim.

KREU VII KONTABILISTI I MIRATUAR DHE SHOQËRIA E KONTABILITETIT

Neni 48 **Kontabilisti i miratuar dhe shoqëria e kontabilitetit**

1. Shërbimet e kontabilitetit janë përgjegjësi e drejtimit të shoqërive tregtare dhe të subjekteve të tjera, që detyrohen nga ligji ta marrin këtë shërbim.

2. Përveçse përmes punonjësve të angazhuar me një kontratë punësimi, të hartuar në përputhje me Kodin e Punës në Republikën e Shqipërisë, shërbimet e kontabilitetit mund të realizohen edhe nga persona fizikë, të kualifikuar si kontabilistë të miratuar, ose nga shoqëritë e kontabilitetit, që angazhojnë kontabilistë të miratuar, të cilët janë certifikuar nga Autoriteti i Certifikimit, sipas dispozitave të parashikuara në këtë ligj. Kontabilistët e miratuar mund të kryejnë edhe shërbime të tjera, që nuk bien në kundërshtim me kërkesat e legjislacionit në fuqi.

3. Shoqëritë e kontabilitetit organizohen si shoqëri tregtare, në përputhje me ligjin e fushës dhe duhet të administrohen nga një ose më shumë persona, të cilët janë pajisur me certifikatën e kontabilistit të miratuar.

4. Përveç dispozitave të parashikuara në këtë kre, anëtarët e organizatave profesionale të kontabilistëve të miratuar u nënshtrohen edhe rregullave të statutit apo rregullave të tjera të brendshme. Rregullat e brendshme të organizatës profesionale të kontabilistëve të miratuar miratohen nga mbledhja e përgjithshme e anëtarëve dhe parashikojnë rregulla për vendosjen dhe zbatimin e masave disiplinore.

Neni 49 **Kriteret e përzgjedhjes dhe të regjistrimit të kontabilistit të miratuar**

Titulli profesional i kontabilistit të miratuar i jepet personit fizik që dëshmon se plotëson këto kritere:

- a) është pajisur me një diplomë të shkollës së lartë, sipas parashikimit të shkronjës “d” të pikës 1 të nenit 16 të këtij ligji;
- b) ka, të paktën, tre vjet përvojë profesionale në fushën e kontabilitetit, të financës, kontrollit financiar dhe në fusha të ngjashme;

- c) ka kryer kursin e kualifikimit në fushën e standardeve kombëtare dhe ndërkombëtare të kontabilitetit dhe raportimit financiar, të organizuar ose të monitoruar nga organizata profesionale e kontabilistëve të miratuar, në të cilën individi dëshiron të anëtarësohet;
- ç) kalon me sukses provimet e aftësisë profesionale.

Neni 50

Provimi i aftësisë profesionale

1. Për të fituar titullin kontabilist i miratuar, kandidatët që plotësojnë kriteret e parashikuara në nenin 49 të këtij ligji, i nënshtrohen provimit të aftësisë profesionale për vetëm dy testet e para, që u nënshtrohen edhe ekspertët kontabël të autorizuar, të parashikuara në shkronjat “a” dhe “b” të pikës 2 të nenit 18 të këtij ligji.

2. Statuti i organizatës profesionale të kontabilistëve mund të parashikojë edhe provime të tjera, si kusht për anëtarësimin në organizatën respektive.

Neni 51

E drejta e ushtrimit të profesionit

1. Profesionit i kontabilistit të miratuar nga personat, që kanë kaluar provimin e aftësisë profesionale, ushtrohet vetëm pas anëtarësimit të tyre në një organizatë profesionale të kontabilistëve të miratuar, të njohur nga bordi, e cila angazhohet për ndjekjen e standardeve profesionale, cilësisht të larta dhe për zbatimin e një kodi etike, që është në pajtim me kodin e etikës të IFAC-së.

2. Organizmat profesionalë të kontabilistëve të miratuar mbajnë dhe publikojnë regjistrin e anëtarëve, i cili ndahet në katër seksionet e mëposhtme:

- a) anëtarë, persona fizikë aktivë;
- b) anëtarë, persona fizikë joaktivë;
- c) kandidatë;
- ç) shoqëri të kontabilistëve të miratuar.

3. Organizmat hartojnë rregullat e tyre të brendshme dhe statutin, i cili është subjekt i miratimit nga bordi.

Neni 52

Kualifikimi i vijueshëm profesional

1. Dispozitat e këtij ligji, të parashikuara për kualifikimin e vijueshëm profesional të ekspertëve kontabël, duhet të zbatohen nga organizmat profesionalë edhe për kontabilistët e miratuar, për aq sa i takon fushës, për të cilën ata janë testuar, në çastin e hyrjes në profesion.

2. Organizatat profesionale të kontabilistëve të miratuar hartojnë rregullat e brendshme për kualifikimin e vijueshëm profesional, si dhe rregullat për regjistrimin e çregjistrimin e anëtarëve.

Neni 53

Regjistrimi i kontabilistëve të miratuar

1. Regjistrimi i kontabilistëve të miratuar dhe i shoqërive të kontabilitetit, si dhe mbajtja e regjistrit e përditësimi i tij bëhen nga vetë organizmat profesionalë të kontabilistëve të miratuar.

2. Regjistri mbahet në format elektronik dhe është i hapur për personat e interesuar.

KREU VIII
SHKELJET DHE SANKSIONET

Neni 54
Fusha e zbatimit

Ky kre zbatohet vetëm për anëtarët e organizatës profesionale të ekspertëve kontabël.

Neni 55
Shkeljet

1. Bordi merr masën disiplinore të heqjes së të drejtës për ushtrimin e profesionit, si dhe vendimin përkatës për çregjistrimin e ekspertit kontabël nga regjistri publik i ekspertëve kontabël në rastet kur:

a) eksperti kontabël i regjistruar, gjatë funksioneve të tij kryen edhe funksionin e të punësuarit apo të tjera, që janë në papajtueshmëri me profesionin e ekspertit kontabël;

b) eksperti kontabël i regjistruar ka bërë kërkesë për çregjistrim, me motivin e fillimit të një veprimtarie të re dhe e ka nisur veprimtarinë e re përpara marrjes së vendimit nga Autoriteti i Regjistrimit, ndërkohë që Autoriteti i Regjistrimit vëren, gjatë shqyrtimit, se veprimtaria e tij e re është e natyrës që u sjell dëm interesave etikë e moralë të profesionit;

c) shërbimet e auditimit të pasqyrave financiare bazohen, në një masë të madhe, te rezultatet e rishikimeve periodike të pasqyrave financiare të përmbledhura dhe të auditimit të brendshëm, që janë kryer nga vetë eksperti kontabël apo shoqëria audituese;

ç) përfshirja e ekspertëve kontabël të regjistruar në shërbime të dhënies së sigurisë për pasqyrat financiare, që përgatiten për qëllime të klientit, kur këto të fundit janë informale dhe të ndryshme nga pasqyrat financiare për qëllime të përgjithshme.

2. Për rastin kur:

a) marrja përsipër e misionit është bërë pa respektuar procedurat e emërimit të tij, të parashikuara nga dispozitat e këtij ligji, si dhe nga rregullat e statutit, merret masa disiplinore e pezullimit të së drejtës së ushtrimit të profesionit nga 1 deri në 2 vjet;

b) vërtetohet se raporti i auditimit nuk bazohet në dokumentacionin, që përmban dosja e auditimit, merret masa disiplinore e pezullimit të së drejtës së ushtrimit të profesionit për jo më pak se dy vjet, deri në heqjen e së drejtës së ushtrimit të profesionit;

c) nga rezultatet e kontrollit të cilësisë rezulton vlerësimi “dobët”, merret masa disiplinore e pezullimit të së drejtës së ushtrimit të profesionit nga 1 deri në 3 vjet;

ç) ka mospërputhje të konsiderueshme ndërmjet deklaramit vjetor të kohës, sipas angazhimeve të kryera dhe kohës në dispozicion të llogaritur, duke mbajtur parasysh bashkëpunëtorët dhe të punësuarit e deklaruar, si edhe kur nuk janë deklaruar bashkëpunëtorët e të punësuarit, merret masa disiplinore e pezullimit të së drejtës së ushtrimit të profesionit nga 1 deri në 3 vjet.

3. Bordi miraton rregulloren për kategorizimin e shkeljeve të tjera, si dhe të masave disiplinore, që zbatohen për secilën kategori.

Neni 56
Masat disiplinore

1. Masat disiplinore për ekspertët kontabël dhe shoqëritë e auditimit janë:

a) këshillimi;

b) qortimi;

c) vërejtja me shënim në regjistrin publik;

ç) gjobat;

d) pezullimi i përkohshëm, për një kohë jo më shumë se pesë vjet;

dh) fshirja e përhershme nga regjistri publik, e cila përmban ndalimin përgjithmonë të ushtrimit të profesionit.

2. Gjobat e parashikuara në shkronjën “ç” të pikës 1 të këtij neni mund të vendosen në varësi të shkeljes disiplinore, në një shumë, që shkon deri në dhjetëfishin e kuotës vjetore të anëtarësisë. Shumat e marra nga gjobat përfshihen në të ardhurat e organizatës profesionale të ekspertëve kontabël.

3. Pezullimi i përkohshëm shoqërohet me ndëshkimin plotësues të moszgjedhjes në organet drejtuese të organizatës profesionale ose në organe të tjera, të parashikuara në këtë ligj. Pezullimi mund të jetë i përgjithshëm ose i kufizuar, në një apo disa kategori shoqërishe e shërbimesh.

4. Eksperti kontabël ose shoqëria e auditimit, si objekt i një ndjekjeje disiplinore, mund të ngarkohet me detyrimin e mbulimit të shpenzimeve të procedurës përkatëse.

Neni 57

Kompetenca në marrjen e masave disiplinore

1. Kompetenca e marrjes së masave disiplinore i takon bordit të mbikëqyrjes publike.

2. Komisioni i disiplinës, i cili funksionon pranë organizatës profesionale të ekspertëve kontabël, apo çdo person, i cili vihet në dijeni të rasteve, që bien në kundërshtim me dispozitat e këtij ligji apo të akteve nënligjore, të nxjerra në zbatim të tij, ka të drejtën t'i drejtohet bordit të mbikëqyrjes publike, duke i vënë në dispozicion edhe dokumentacionin përkatës që vërteton shkeljen.

Neni 58

Përvetësimi i titullit profesional

1. Përvetësimi i titullit profesional të ekspertit kontabël, ushtrimi i profesionit të ekspertit kontabël apo përdorimi i emërtimeve si shoqëri audituese, pa qenë regjistruar më parë në regjistrin publik të ekspertëve kontabël, si dhe përdorimi i çfarëdo titulli, që synon të krijojë një ngjashmëri ose një konfuzion me këta tituj profesionalë apo emërtime, përbën kundërvajtje penale dhe dënohet me gjobë ose me burgim deri në dy vjet.

2. Fillimi apo vijimi i procedurave penale nuk pengon, as pezullon vijimin e procedurave disiplinore dhe as marrjen apo ekzekutimin e sanksioneve disiplinore.

KREU IX

DISPOZITA KALIMTARE DHE TË FUNDIT

Neni 59

Dispozita kalimtare

1. Ekspertët kontabël të autorizuar, që e kanë fituar titullin në përputhje me rregullat e parashikuara në vendimin nr.150, datë 30.3.2000 të Këshillit të Ministrave “Për miratimin e rregullave për organizimin e profesionit të ekspertëve kontabël të autorizuar”, të ndryshuar, konsiderohen mbajtës të këtij titulli edhe pas hyrjes në fuqi të këtij ligji dhe regjistrohen në regjistrin publik të ekspertëve kontabël.

2. Kontabilistët e miratuar, që e kanë fituar titullin në përputhje me rregullat e organizimit dhe të certifikimit të kontabilistëve, të parashikuara në udhëzimin e Ministrit të Financave, konsiderohen mbajtës të këtij titulli edhe pas hyrjes në fuqi të këtij ligji dhe regjistrohen në regjistrin e organizatës profesionale ku bëjnë pjesë.

3. Stazhierët, të cilët e kanë filluar stazhin profesional përpara hyrjes në fuqi të këtij ligji, konsiderohen njësoj edhe në kuptim të këtij ligji dhe vijnë me përfundimin e stazhit, sipas afateve të parashikuara më parë.

Neni 60

Hartimi i akteve nënligjore

1. Ngarkohet Ministri i Financave që, brenda dy muajve nga hyrja në fuqi e këtij ligji, të paraqesë për miratim në Këshillin e Ministrave rregullat e organizimit dhe të funksionimit të bordit të mbikëqyrjes publike, si dhe shpërblimin e anëtarëve të tij dhe, brenda tre muajve nga hyrja në fuqi e këtij ligji, të ketë përfunduar ngritjen e bordit të mbikëqyrjes publike.

2. Ngarkohet Ministri i Financave që, brenda tre muajve nga hyrja në fuqi e këtij ligji, të miratojë udhëzimin për rregullat për organizimin dhe funksionim e Autoritetit të Certifikimit dhe, brenda katër muajve nga hyrja në fuqi e këtij ligji, të ketë përfunduar emërimin e anëtarëve të autoritetit.

3. Ngarkohet Ministri i Ekonomisë, Tregtisë dhe Energjetikës që, brenda tre muajve nga hyrja në fuqi e këtij ligji, të miratojë udhëzimin për rregullat për organizimin dhe funksionimin e Autoritetit të Regjistrimit dhe, brenda katër muajve nga hyrja në fuqi e këtij ligji, të ketë përfunduar emërimin e anëtarëve të autoritetit.

4. Ngarkohet bordi i mbikëqyrjes publike që, brenda dy muajve nga data e konstituimit të parë të tij, të miratojë të gjitha aktet e parashikuara në këtë ligj, që janë kompetencë e tij.

5. Ngarkohet Instituti i Ekspertëve Kontabël të Autorizuar që, brenda tre muajve nga hyrja në fuqi e këtij ligji, të organizojë funksionimin e tij, në përputhje me dispozitat e këtij ligji, si dhe të bëjë të gjitha ndryshimet në statut e në rregulloret e brendshme të veprimtarisë së tij, të rregullores së organizimit e funksionimit të bordit të mbikëqyrjes publike dhe autoriteteve të certifikimit e të regjistrimit, si dhe të marrë të gjitha masat, për t'ua kaluar dokumentacionin dhe veprimtaritë përkatëse këtyre organeve.

6. Ngarkohet Instituti i Ekspertëve Kontabël të Autorizuar që, brenda tre muajve nga hyrja në fuqi e këtij ligji, të ketë përfunduar procesin e programimit dhe të plotësimit të regjistrimit publik të ekspertëve kontabël dhe shoqërive audituese, në përputhje me dispozitat e këtij ligji.

7. Ngarkohen organizatat profesionale të kontabilistëve të miratuar që, brenda tre muajve nga hyrja në fuqi e këtij ligji, të kenë përfunduar procesin e programimit dhe të plotësimit të regjistrimit të anëtarëve, në përputhje me kërkesat e këtij ligji.

Neni 61 **Shfuqizime**

Vendimi nr.150, datë 30.3.2000 i Këshillit të Ministrave “Për miratimin e rregullave për organizimin e profesionit të ekspertëve kontabël të autorizuar”, i ndryshuar, shfuqizohet.

Neni 62 **Hyrja në fuqi**

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr.6101, datë 19.3.2009 të Presidentit të Republikës së Shqipërisë,
Bamir Topi**

Abonimet vjetore për Fletoren Zyrtare mund të bëhen pranë Postës Shqiptare ose pranë Qendrës së Publikimeve Zyrtare, në adresën: Bulevardi “Zhan d'Ark”, prapa ish-ekspozitës "Shqipëria Sot", tel: 04 258 472 (Kryeredaktori).
Çmimi i abonimit në postë për Fletoret Zyrtare 2009 është 16 000 lekë.
Çmimi i abonimit në QPZ është 14 000 lekë pa detyrimin e shpërndarjes në adresa.

Hyri në shtyp më 30.3.2009
Doli nga shtypi më 31.3.2009

Tirazhi: 3300 copë	Formati: 61x86/8
--------------------	------------------

Shtypshkronja e Qendrës së Publikimeve Zyrtare
Tiranë, 2009

Çmimi 40 lekë